

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
APR 29 1940

75

T 3148/0.82

山西通志卷第一百七十七

哈佛大學漢和圖書館珍藏印

旨修輯

山西巡撫都察院右副都御史臣覺羅石麟奉

辨證二

潞安府

長治縣

綦母恢見魏王曰秦悉塞外之兵與周之衆以攻南陽而兩上黨絕矣樊餘謂楚王曰韓兼兩上黨以臨趙卽趙羊腸以上危 王海注戰國策所謂兩上黨者蓋在韓趙之間猶安邑魏地而云取韓安邑也

史記正義秦上黨郡今澤潞儀沁等四州之地兼相州之半韓總有之至七國時趙得儀沁二州之地韓猶有潞州及

澤州之半半屬趙魏沁州在羊腸坂之西儀并代三州在  
勾注山之南秦以三郡攻趙之澤潞則勾注之南趙無地  
趙收天下伐齊蘇厲爲齊說趙王曰秦盡韓魏之上黨則  
地與國都邦屬而壤挈者七百里秦以三軍强弩坐羊腸  
之上卽地去邯鄲二十里且齊以三軍攻王之上黨而危  
其北則勾注之西非王之有也潞安志一曰韓魏之上黨  
一曰王之上黨地三晉均有之矣

玉海呂氏曰秦并六國始於韓者蓋李斯之策也杜牧曰秦  
萃銳三晉經六世乃能得韓遂折天下脊後得趙因拾取  
諸國林氏曰六國并於秦者秦知天下之勢取韓魏以執  
其樞也

秦坑降卒之二年復攻趙定太原上黨尚有未降邑也又十

三年而悉拔上黨諸城立太原郡以上黨屬之  
韓信定魏地置上黨郡

周大象元年五月辛亥以潞州上黨郡爲代國邑一萬戶代  
王達之國 宣政元年正月癸酉分并州上黨郡置潞州  
舊唐書上黨漢壺關縣隋分置上黨州所治 武德二年置  
總管府於潞州貞觀二年廢 八年置都督府 開元十

四年升潞州爲大都督府與并益荆楊同以儀石二州隸  
焉天寶 缺 年置澤潞沁節度使治潞州 相衛節度號昭  
義領相衛貝磁邢洛六州又詔昭義軍兼領澤潞徙治潞  
州 昭義節度使節制澤潞邢洛磁五州而治潞州節度  
使孟方立謂潞州山川高險而人俗勁悍自劉稹以來常  
逐其帥且已邢人也因徙其軍於邢州而潞人怨方立之

徙因以澤潞二州歸於晉晉遣李克修爲澤潞節度使方  
立以邢洛磁三州自爲昭義軍 唐廣明後昭義節度使  
高潄與賊戰石橋敗績其將劉廣擅還據潞州別將孟方  
立殺廣因取邢洛磁三州貳於已昭義所隸惟澤一州上  
以兵部侍郎鄭昌圖權守潞人心多附方立昌圖不能制  
朝議以大臣鎮撫授王徽同平章事領昭義節度使是時  
李克用亦爭澤潞徽度未能以兵抗之奉表固辭詔可  
五代史考潞州唐故曰昭義梁末帝時屬梁改曰匡義歲餘  
唐滅梁改曰安義晉復曰昭義邢州故屬昭義軍節度昭  
義所統澤潞邢洛磁五州唐末孟方立爲昭義軍節度使  
徙其軍額於邢州而澤潞二州入於晉故當唐末有兩昭  
義軍梁晉之爭或入於梁或入於晉梁以邢洛磁三州爲

保義軍莊宗滅梁改曰安國

後唐莊宗以潞州城池高深將屢叛悉夷之

宋太平興國初改昭德軍節度使後領河東路兵馬鈐轄兼  
提舉澤晉絳州威勝軍屯駐泊本城兵馬巡檢事 本潞  
州建中靖國元年改爲軍崇寧三年陞爲府仍還昭德舊  
節

金天會六年節度使兼潞南遼沁觀察處置使 宣宗時置  
潞州元帥府

金末林州元帥府徙潞民往來疲甚上黨公張開請並立元  
帥府從之

元初爲隆德府行都元帥府事太宗三年復爲潞州隸平陽  
路至元三年乃以錄事司併入上黨縣

明初省上黨入潞州嘉靖中析爲長治

上黨廢縣漢壺關縣地隋析置上黨縣明省入潞州其境有子城隋開皇三年築周三里一十步今改府治

潞安界辨 潞安自明嘉靖陞爲府前此名潞州考唐武德二年於潞州置總管府貞觀八年改置都督府開元時升爲大都督府相衛節度號昭義領相衛貝磁邢洛六州又詔兼領潞澤徙治潞州則是昭義軍所轄非獨今山西境也邢卽順德邢臺等地洛卽廣平永平等地磁卽磁州屬今皆爲直隸兩西境唐末潞州節度使孟方立徙軍於邢州而澤潞二州入於晉方立以邢洛磁三州自爲昭義軍故有兩昭義軍其後或改匡義或改安義或改保義或改安國梁晉分爭各有更易宋上黨郡昭義軍節度陞爲

隆德府大都督府鈐轄兵馬兼提舉威勝軍屯金節度使兼潞南等觀察處置使又置潞州元帥府誠重其地也又考隋唐宋金元涉縣皆隸上黨潞州金貞祐興定間且升爲崇州隸以黎城元至元三年乃以涉縣割入於正定府

長治壺關辨 秦置上黨郡治壺關城漢治長子城前漢壺關註云有羊腸阪卽黎亭是後漢註云文王戡黎卽此又引上黨記曰東山在城東魏地志註董卓亂治壺關城慕容儁治安民城後遷壺關城皇始元年遷治安民真君中復治壺關隋開皇初廢上黨郡有壺關縣大業初復置郡廢壺關入上黨唐武德四年析上黨置壺關有啟聖宮有瑞閣有五龍山馬駒山宋以後皆名上黨別置壺關明

初省入潞州嘉靖七年升州爲府十年乃置長治附郭今壺關在府治東二十五里蓋長治卽隋唐以後之上黨縣上黨卽古壺關也

### 長子縣

漢志注長子周史辛甲所封鹿谷山濁漳水所出東至鄴入清漳師古曰讀曰長短之長今俗爲長幼之長非也

後漢志注上黨郡秦置雜陽北千五百里

周禮職方氏其川漳註漳出長子長丁丈反左傳晉人執石買於長子註長丁丈反長從上聲舊矣顏師古謂爲長狄所居而得名夫赤狄見於春秋而武王封辛甲已稱長子則顏說誤也

戰國策趙襄子出亡問所之左右曰長子城厚完

職方氏冀州畜宜牛羊上黨舊有猗氏縣

岳陽有猗氏關

地當在長

子屯留西北間

地形志長子慕容永所都有長子城應城傾城幸城有鮑宣墓

隋志長子註後齊廢開皇九年置曰寄氏縣十八年改爲長子舊有屯留樂陽二縣後齊廢

通考隋置長子元明因之

長子故城在縣西

長子辨 山海經蒼梧之山舜葬於陽丹朱葬於陰括地志云丹朱故城在鄧州內鄉縣內鄉亦有丹朱墓考浮山爲丹朱食邑而平陽府及陽城縣皆有丹朱墓長子縣又有丹朱陵郭守邦曰陵當作嶺聲相近遂傳訛也或曰此

堯暄父子墓或曰嶺土色赤故名丹朱陵非以肩子之故  
按武王封辛甲於長子晉人執石買於長子是周以前已  
有長子地名西又近浮山界即謂邑名因丹朱而傳也可  
洹氏辨 水經注曰洹水出上黨洹氏縣洹山山在長子  
縣今考上黨古無洹氏縣邑惟秦漢有洺氏縣今高平是  
也有洺水出丹朱嶺下即丹水是也丹水亦屬高平丹朱  
嶺即長子與高平分界處 考唐書有洹水縣本隸相州  
天祐三年後屬魏州亦非洹氏縣  
屯留縣

襄公十七年晉人執孫蒯於純留 趙肅侯元年奪晉君端  
氏地徙於屯留 純留水經註一名戎屯 晉人滅赤狄  
甲氏及留吁 留吁今屯留也甲氏潞之遺種留吁其殘

邑也銅鞮有甲水疑即甲氏也 周赧四年秦惠王伐韓  
張儀曰路當屯留之道

竹書紀年鄭取屯留長子

鄭即韓

秦始皇八年長安君擊趙反死屯留軍吏皆斬遷其民於臨  
兆 八年成安君擊趙壁於屯留

漢志註屯留桑欽言絳水出西南東入海師古曰屯音純  
括地志屯留故城在潞州長子縣東北三十里本漢屯留縣  
城也

上黨郡余吾 地形志襄垣郡建義分上黨之屯留置

後齊廢屯留開皇十六年復

續通考屯留唐自霍壁移今治元初併入襄垣後復置

屯留辨 屯留一名余吾一名純留一名戎屯一名留吁

山西通志 卷一百一十七 九  
此胥見於史傳可考至前漢上黨郡隋氏後漢曰猗氏後  
魏改稱寄氏註云有猗氏城建義元年又分屯留置建義  
縣有鹿臺山及祠又普泰中分長子屯留置樂陽縣有望  
天嶺絳水所出有堯祠此舊誌所以謂屯留有寄氏之半  
也屯留故城在長子東北爲韓趙要地樂陽縣今隸長子  
爲樂陽村又考開皇九年置寄氏縣十八年改爲長子則  
長子亦兼有漢猗氏地云

### 襄垣縣

漢志注襄垣莽曰上黨亭

地形志鄉郡襄垣註二漢晉屬上黨 襄垣郡建義元年置  
治襄垣城領縣四襄垣五原建義刈陵

隋書襄垣註舊置襄垣郡後齊郡廢後周置韓州大業初州

### 廢有鹿臺山

舊唐書銅鞮漢縣隋屬韓州武德元年屬沁州三年分置甲  
水縣五年移治鮐水堡六年移於今所屬韓州省甲水縣  
韓州廢屬潞州

按韓州領襄垣黎城涉銅鞮鄉五縣貞觀十七年州廢

襄垣辨 漢晉以前隋唐以後襄垣皆屬上黨郡惟北魏

於鄉郡置襄垣註有五音山神祠襄垣城臨川城又於襄

垣郡置襄垣註建義元年分鄉郡之襄垣置有安民城襄

垣城卽郡治也按鄉郡置於延和二年由延和至建義凡

九十餘年非有兩襄垣特增易其城郭更移其郡屬耳他

如漢涅縣之故城北魏之臨川城後周置韓州之韓城唐

開元龍見之青城皆非今治或曰趙襄子曾築城甘水之



陽故卽以襄垣名縣云

潞城縣

宣公十五年六月癸卯晉荀林父敗赤狄於曲梁辛亥滅潞

晉師滅赤狄潞氏以潞子嬰兒歸 獲長狄焚如 晉

敗范中行之師於潞獲籍秦高疆

路史潞參盧役春秋潞子都曲梁卽鷄澤縣周置潞州建德七年今之

潞城漢縣亦作路 漢志注潞故潞子國

地形志刈陵註二漢晉曰潞屬上黨真君十一年改後屬有

黎城潞城武軍城涉城有涉太臺壁

隋開皇十六年置有黃阜山

續通考唐末改潞子縣尋復潞城宋金元明因之

古潞城縣東北四十里漢縣後魏改刈陵縣移沁水北城遂

廢 潞縣故城在潞城縣西

微子遺迹辨 史記微子持祭器造軍門武王釋之復其位

成王誅武庚後乃命之代殷後奉先祀作微子之命以申

之國於宋殷之餘民甚戴愛之據九域志博州有微子城

或云在魯或云徐沛東南微山有微子冢路史皆以爲非

今考河南歸德府城西南有微子墓新鄉縣亦有廟而潞

城東北十五里有微子城居民因以名其村鎮更上五里

有微子嶺潞水出其下西流入濁漳爲冀州巨津且邑有

三仁廟存焉考其地去宋遠矣閻若璩四書釋地微箕二

國名鄭康成謂俱在圻內今潞城縣東北有微子城榆社

縣東南有古箕城皆其所封地疑近是今按潞城與榆社

胥近殷都而潞城尤近應屬微國初封不得以宋微兩地

爲疑

黎城縣

西伯戡黎

大紀黎不共王命商不知討西伯發戡之 後

漢志壺關有黎亭故黎國文王戡黎卽此 續通考隋氏

始置黎城元省入潞城元祐初復置金元明因之

路史黎黎氏故國一作黎山氏服虔曰子姓國侯爵玉篇作

釐鄴文王所戡者與殷都接今潞城東十八里有故黎侯

城黎亭衛地故黎侯寓衛

毛詩物考黎任姓侯爵黃氏曰今潞州上黨黎城壺關三縣

皆古黎國地鄭箋黎在衛西在濬縣西二里乃失國而寓

於此非黎國也

路史黎夏諸侯九黎杜預云東夷國晉侯略狄土立黎侯非

文王所戡矣故晉志二黎國

路史飢

飢音

昔文王伐飢本作飢音祈卽耆黎也周書傳五年

伐耆而大傳作戡耆故說以爲黎也

隋書後魏以潞縣被誅遺人置十八年改名黎城有積布山

松門嶺

唐志天祐元年更名黎亭

宋志黎城註天聖三年徙治涉之中南白馬驛熙寧三年省

入潞城縣元祐元年復

元志黎城至元二年併涉縣偏城等十三村入焉

羅苹曰黎亭卽黎陽故城一曰黎侯城水經黎陽故城在黎

山東北班志上黨壺關東北有黎亭九域志亭在黎侯嶺

上今通利之黎陽漢黎縣有黎陽山古今山川記云衛黎

陽國也黎侯寓衛以中路泥中二邑處之

通鑑前編商自武乙以來復都河北在今衛州之朝歌而黎今潞州之黎城至衛計地三百餘里耳則黎乃商畿內侯國也

明秀王見澍論書至西伯戡黎長史王誠主吳氏說曰戡黎者武王也右史趙銳主孔氏說曰實文王事爭之失色見澍曰經義未有定論不嫌徃復若是非先朝簡二先生意也

日知錄以關中并天下者必先於得河東秦取三晉而後滅燕齊秦苻氏取晉陽而後滅燕宇文氏取晉陽而後滅齊故西伯戡黎而殷人恐矣

黎辨 黎城縣名定於隋白馬驛之黎城自宋始遷黎本

强大今長治壺關黎城等縣皆古黎地或曰子姓或曰任姓皆侯國爵其後恃壺口關吾兒峪之險不共王命故西伯戡之尚書戡黎乃指全國而言非謂今治白馬驛之黎城也後漢書壺關有黎亭故黎國即水經所云黎陽故城在黎山東北九域志所云亭在黎侯嶺上者是元併涉縣金隸崇州後魏本刈陵至春秋時黎侯失國而寓衛黎在衛西詩故云匪車不東山川記以黎陽山為衛黎侯國應指所寓之地而名之二漢晉魏郡魏黎陽郡隋汲郡唐魏州宋衛州金濬州皆載黎陽非文王所戡之黎也

壺關縣

漢志壺關注有羊腸阪沾水東至朝歌入淇應劭曰黎侯國也今黎亭是

地形志上黨郡註秦置治壺關城前漢治長子城董卓作亂  
治壺關城慕容儁治安民城後遷壺關城 皇始元年遷  
治安民真君中復治壺關有白馬祠劉公祠上黨關石井  
關天井關領屯留長子壺關寄氏樂陽

舊唐志潞州壺關武德四年分上黨置移治於高望堡貞觀  
十七年移治進流川

宋金元明治皆仍舊

### 平順縣

續通考平順本壺關之東鄙潞城之東南地陵川之北鄙嘉  
靖中析其地以置縣

縣本青羊里舊隸潞城明嘉靖三年里人霸吏陳卿起爲盜  
潞城令不能制嘯聚滋衆恃險出沒事聞調河南山西官

兵勦之八年賊平兵科都給事中夏言勸奏建縣治

王世貞張孚敬傳潞州盜陳卿據青羊山殺官吏中外頗務  
姑息爲撫安計而公獨破之卒捕誅卿

### 汾州府

#### 汾陽縣

竹書紀年西河后啓征之

夷吾遺里克書誠得立請遂封子於汾陽之邑

按此則春秋時已有汾陽之稱矣

魏西河守吳起築城西河以拒秦關地千里

史記秦惠公初稱王得上郡西河

史記衛青空河南地置朔方郡陰山縣郡隸并州縣隸西河

徐廣曰臯狼地名在西河 索隱按地理志臯狼是西河郡

之縣名蓋孟增幸於周成王成王居之於臯狼故云臯狼後漢志太原郡於離茲氏註莽曰茲同 縣南十五里鞏村即漢茲氏故城漢高帝封沂陽侯嬰為侯國史記夏侯嬰食邑茲氏是也俗名甄子城又傳會魏文甄夫人之說不足據 按司馬子盛碑西河縣城即茲氏

西河郡註武帝置雒陽北千二百里也 統十三城有中陽地形志晉州西河郡舊汾州孝昌二年為賊所破遂居平陽界還置郡 隰城孝昌中置 汾州西河郡置茲氏城

昌中改後陷關西天平中置寄治汾州隰城縣界隋開皇元年築長城汾州刺史韋冲綏懷亡叛者

隋西河郡註後魏置汾州後齊置南朔州後周改介州統隰

城介休永安平遙靈石綿上六縣

舊唐志汾州西河漢美稷縣隋為隰城縣上元元年九月改為西河縣

唐西河郡註本浩州武德三年更名汾州領西河孝義介休靈石平遙五縣宋金領縣同宋西河郡軍事金天會六年置汾陽軍節度使又置河東南北路提刑司元初立汾州元帥府後府廢領西河平遙介休孝義四縣

按開皇置西汾州改隰州又隋書東魏置文成郡為南汾州均非此汾州也惟西河郡下註隰城舊置西河郡者近是然亦非今之隰州

括地志中陽即西陽在汾州隰城南即今孝義縣也晉嘗省入隰城縣

通典隰城有美稷鄉卽漢美稷縣地又有漢京陵縣卽晉趙  
文子與叔向觀於九原之所

路史趙藺漢西河屬縣

金志汾州上宋西河郡軍事天會六年置汾陽軍節度使後  
又置河東南北路提刑司領五縣 西河註有謁泉山比  
干山文水汾水

元太祖十三年木華黎克汾州立汾州元帥府割靈石縣隸  
平陽之霍州 至元二年行州事屬太原路

汾州舊志秦惠王伐魏魏入西河於秦及始皇郡縣天下始  
隸太原郡治茲氏 後漢書西河郡武帝元朔四年置  
建武十年省定襄郡徙其民於西河

魏置西河郡治茲氏 晉太寧初劉曜自隴長驅至西河金

鼓聲沸河動地 張平跨有西河地

縣東十五里有瀦城文湖汾水交流之西晉改曰隰城漢改  
曰西河明省入汾州

按隋書太原郡有汾陽縣乃舊陽曲開皇六年改陽直  
者也非此汾陽

汾隰界辨 汾州郡治在汾陽其南三十里爲孝義東爲  
平遙西爲寧鄉東南爲介休西北爲永寧臨縣西南爲石  
樓而隰州去汾郡治凡二百七十里爲古蒲子地或因汾  
陽孝義舊爲隰城所分遂謂與隰州同轄此未覈也汾陽  
漢爲美稷又爲茲氏孝義漢魏爲中陽二縣在晉同曰隰  
城北魏亦曰隰城太延中改爲什星軍太和八年復隰城  
又析隰城爲永安隋曰隰城唐上元元年改汾陽曰西河

山西通志 卷一百一十一  
貞觀元年改永安曰孝義宋以後因之隋唐二縣皆屬西河郡是隰城非隰州甚著漢河東郡蒲子晉劉淵據之後置大昌郡北魏爲長壽縣屬仵城郡太和間於此置南汾州後周置龍泉郡隋初廢郡復置西汾州尋改隰州又改縣曰隰川唐武德元年復爲隰州天寶元年改大寧郡乾元元年仍爲隰州金天會六年改南隰州天德三年去南字元爲隰川明併隰川爲隰州若以汾之隰城指爲隰州又以魏齊時隰州嘗有南汾州西汾州之名而指爲汾州是兩誤也顧所以誤稱亦有故魏延和三年汾州爲鎮太和八年西河郡治在茲氏城領隰城介休永安三縣十二年置汾州治蒲子城孝昌中陷賊移治西河遂居平陽界還置郡並置永安隰城介休三縣屬晉州武定五年又以

永安中所置隰城介休五城三縣改屬義州五城郡當其治蒲子城在後周所改石城之蒲子縣地未嘗在隰州地而隰州舊名蒲子此西汾州南汾州所以易混今之汾州也魏孝文置石城縣屬汾州五城郡周大象二年改蒲子縣計自魏高祖太和十二年至肅宗孝昌三年共三十九年其治蒲子城未久不覈其遷徙之迹而遽指汾州隰州爲一地則古今之地名其不混淆者幾希

平遙縣

趙武靈王十年秦取中都西陽安邑徐廣曰太原有中都縣西河有中陽縣

晉陽志漢高祖十一年討韓信遣太尉周勃平定代地遂取山陽太原之區亦屬代立子恒爲代王都晉陽後都中都

魏時廢爲縣屬平陶

尹耕代國考 代自入漢以來其國數易大抵有三曰山北也山南也山東也山北之代舊國也始於商湯歷代因之是故齊桓之所服趙襄之所并代成安陽之所封公子嘉之所奔趙歇陳餘之所王夏說之所守劉喜之所棄陳豨之所監皆是也所謂蔚之廢城也山南之代徙都也始於高帝十一年分山北爲郡而稍割太原地益之以自爲國是故文帝之始封中年之所徙入繼之所自臨幸之所復以及於武子參之所分後武徙淮陽子參之所合皆是也所謂晉陽中都也山東之代再徙也始於武帝元鼎中漢廣關以常山爲阻徙代於清河後王莽繼絕改號廣宗是故王義之所都子年之所廢如意之所服皆是也所謂清

河也語其都則始爲代繼爲晉陽中都終爲清河前後三變也語其號則始爲代繼爲代太原復爲代終爲廣宗前後四變也故凡言代王代相國其在文帝以前者爲吾土而以後者否凡言代郡代守尉則上自趙秦下終兩漢皆吾土也

按代卽故蔚州由代遷晉陽中都在漢孝文之世如淳以爲先都晉陽後遷中都正義引括地志中都故城在汾州平遙縣西南十二里日知錄文帝過太原復晉陽中都三歲又立子武爲代王都中都卽今平遙縣此當與太原廣昌叅覈

漢志太原郡中都 平陶註莽曰多穰 京陵註莽曰致城 師古曰卽九京 如淳曰文紀言都中都又文帝過太原



復晉陽中都二歲似遷都於中都也

後漢志 平陶 京陵註春秋時九京禮記曰趙武從先大

夫於九京鄭元曰京字之誤當為九原方氏曰指其冢之

高曰京指其地之廣曰原

隋平遙註開皇十六年析置清世縣大業初廢入焉又後魏

置蔚州後周廢有鹿臺山

舊唐志汾州平遙漢平陶縣後魏廟諱改陶為遙武德屬介

州州廢來屬

元初屬太原府至元二年屬汾州

按二漢之平陶後魏之平遙俱屬太原郡蓋是時汾州

未置郡也

介休縣

左傳杜註西河界休縣南有地名綿上

晉滅虞虢遷其民於此地曰虞城

漢志界休註莽曰界美 鄔註九澤在北是為昭餘祁并州

藪晉大夫司馬彌牟邑

後漢志鄔註史記韓信破夏說於鄔 界休有千畝聚註左

傳曰晉為千畝之戰在縣南

按漢太原郡鄔縣後徙武陵遂廢

地形志太原郡鄔註有中都有鄔城太岳山慮水入區夷澤

西河郡介休註孝昌中置 寧州註興和中置寄治汾

州介休城領郡四 武康郡治東多城 靈武郡 初平

郡 武定郡 蔚州註永安中改懷荒禦夷二鎮置寄治

并州鄔縣界領郡三 始昌郡領縣二 於門 蘭泉

忠義郡領縣二 葦池 楊柳 附恩郡領縣三 兩涼

利石 化政

後魏明帝時為寇擊破靜帝時築城遷朔州軍居之立南朔州即汾州介休為屬邑

按魏徙鄔城縣民居武城在今治東北齊入平遙遂廢隋書註後魏置定陽郡平昌縣後周改郡曰介休以介休縣入焉開皇初郡廢十八年縣改曰介休

唐書註義寧元年以介休平遙置介休郡武德元年曰介州貞觀元年州廢以二縣來屬有鼠雀谷有介山

元初隸太原府至元二年屬汾州省小靈石入焉路史介之推先國即汾之介休有介山綿上山地今沁之綿上寶萃以為密界晉黔陬乃介根也

按郡國志界休有介山有綿上聚子推廟萬泉亦有介山俱傳為子推隱處祝志介休之綿上盤踞深固可以藏隱故求而不獲萬泉之介山屹然孤立因傳會以為推隱而日知錄引漢書武帝紀及楊雄河東賦為介山証兩說固當叅覈

孝義縣

漢志西河郡中陽

地形志汾州西河郡註永安中置治永安縣白坑城 永安

註分隰城置 南汾州南吐京郡領縣一 新城 中陽

郡領縣二 洛陵 昌寧 顯州註永安中置治汾州六

壁城領郡四 定戎郡治瓜城縣二 零山 陽林 建

平郡州治縣二 昇原 赤谷 真君郡治東多城 武

昌郡治團城

西河有土軍縣元魏太平真君九年改吐京郡

北齊天保元年併介休入永安後周宣政元年復置

唐志孝義本永安貞觀元年更名

宋書太平興國元年改爲中陽後復爲孝義熙寧五年省爲

鎮入介休元祐元年復

元至元三年割溫泉縣之半隸本縣置巡檢司

按地形志浮陽郡有高城縣註二漢晉屬渤海治高城

有平津鄉興和中編流民立東西河郡隰城縣武定末

罷此屬滄州與汾州隰城別

臨縣

漢志西河郡臨水注莽曰監水

唐志石州昌化郡臨泉注本太和縣武德三年更名置北和

州別析置太和縣四年以太和隸東會州貞觀三年州廢

以臨泉來屬

宋元符二年升葭蘆吳堡二寨爲晉寧軍以石州之臨泉縣

隸焉

金志石州臨泉宋隸晉寧軍有黃河臨泉水 貞祐末元兵

南下先諸郡歸附臨泉令袁湘夜載鴟夷濟河欸字罕營降木華黎曰此平定

夏國之兆也升臨泉爲大定府

元志臨州宋置晉寧軍金廢軍置臨水縣隸石州中統二年

仍改臨泉縣直隸太原府三年升臨州

縣南三十里爲古烏突郡建於北魏領縣六隋開皇三年改

善訓府有古城址唐高祖廢爲五社東大岳南宰都西玉

溪北古壇中善慶今東關豐市街碑記猶存臨泉古城在今治西北

石樓縣

魏孝文帝置嶺西縣屬吐京郡後改嶺西為吐京縣

地形志汾州吐京郡真君九年置孝昌中陷寄治西河領縣

二新城註世祖名嶺東 吐京註世祖名嶺西胥太和二

十一年改

後魏孝文置長壽縣隋廢唐初復置尋省 後周置臨河郡

及縣 唐初復置縣後省

隋志石樓註舊置吐京及吐京縣開皇初郡廢十八年縣改名

舊唐志石樓漢土軍縣隋改為石樓武德二年於縣置西德

州領長壽臨河石樓三縣貞觀元年廢西德州省長壽臨河二縣以石樓屬東和州二年又省東和州以石樓屬隰州 北有上平津

金屬隰州

明萬曆壬子平陽易靈石縣石樓改隸汾州府

永寧州

通典初趙之離石邑後為秦趙二國之境秦本紀昭王伐趙取離石是也 周慎靚十二年趙武靈王破林胡樓煩始築離石城

漢建武二十五年居烏桓於塞內二十六年遣中郎將段郴授南單于璽綬入居雲中郴將兵衛護之二十七年徙南單于部於西河美稷

山西通志 卷一百一十一  
永和五年徙西河郡居靈石注離石縣名在郡南五百九里  
西河本都平定縣至此徙於離石時又徙上郡居夏陽朔方居五原西河  
卽勝州東河古有西河郡

地形志晉州北五城郡領縣三 平昌 石城 北平昌  
郡縣胥興和二年置

唐石州昌化郡本離石郡天寶元年更名領縣五 離石註  
有孝文山 平夷 定胡註武德三年置西定州貞觀二  
年州廢來屬又析孟門縣七年省西有孟門關 臨泉  
方山註武德二年以縣置方州三年州廢來屬今縣治北  
有方山城

宋石州昌化郡軍事舊帶嵐石隰三州都巡檢使元豐五年  
置葭蘆吳堡二砦隸州因置二砦沿邊都巡檢使遂令三

州各帶沿邊都巡檢使初領縣五元符二年陞葭蘆砦爲  
晉寧軍以州之臨泉縣隸焉大觀三年復以定胡縣隸晉  
寧軍領離石平夷方山三縣

金志石州舊昌化軍刺史興定五年復隸晉陽從郭文振之  
請也領縣六離石註倚有胡公山離石水石窟鎮 方山  
註貞祐四年徙置積翠山有方山赤洪水 孟門註舊名  
定胡明昌六年更名宋隸晉寧軍有黃河寧鄉水 溫泉  
註貞祐四年改隸汾州有遠望山溫泉 臨泉註宋隸晉  
寧軍有黃河臨泉水 寧鄉註舊名平夷明昌六年更

元志石州等處怯憐口千戶所延祐七年置

元中統二年省離石縣入本州三年復立至元三年省溫泉  
入孝義以臨泉爲臨州舊置司候司後與孟門方山俱省

山西通志 卷一百一十一  
入離石領離石寧鄉二縣

定胡城後改孟門城西百二十里宋爲離石縣有嘉禾碑元改離石巡檢司明因之今廢址存

明隆慶元年署州事太原府同知李春芳以石失二字同音請更名爲永寧

王運新呂梁山辨 按春秋成五年乙亥夏梁山崩書而不繫之國爲天下紀異也左氏謂晉侯以傳召伯宗謀之公羊以爲河上之山其崩壅河三日不流穀梁云梁山崩壅遏河三日不流具載伯宗對晉侯之語呂不韋云呂梁未鑿河出孟門之上酈道元謂呂梁之石崇竦河流激盪有震動天地之語諸說皆言爲晉山也胡氏乃引韓奕之詩証爲韓國之鎮言韓爲晉滅而大夫韓氏以爲邑焉張氏

爲同州韓城有禹貢梁山說與胡氏合杜氏云梁山在馮翊夏陽縣北方輿勝覽云梁山在同州郃陽縣諸說皆言非晉山也東魯徐先生昌論斷云若言韓國之鎮則韓在河西實爲雍地而治梁及岐不應繫之冀州也獨九峰蔡氏書傳所指在離石東北與左氏諸說合而公穀不韋道元所云壅河不流呂梁未鑿震動天地之語則爲無稽竊意公穀得之傳聞而未至其地胡氏諸人亦徒求河上之山不復審辨州域之異遂有韓郃等語或韓郃地近大河禹跡曾及之而山名偶同焉故也余夙慕梁山之勝有味乎徐先生之記每欲躬探古跡而未敢確定其是非甲寅秋始登絕頂徘徊四望高冠諸山下視崩石磴磴益信胡氏諸人實未嘗親至其地而承訛踵誤遂有諸說之紛紛

也夫禹之治水也必登高遠瞭相度詳明然後施疏導之功使止求之傍河之山則必顧此遺彼不蹈鯀考之轍不止又焉能天地平成俾烝民乃粒嘆明德於不衰哉因服徐先生之考辨精詳而信呂梁之在吾石者無疑是爲辨按梁山屬冀州不屬雍州禹貢已是鐵案太史公曰遷生龍門韋昭注云在縣北博物記曰有韓原韓武子采邑是韓原非河西地而爾雅曰梁山晉望此一語尤可証梁山之爲晉地困學紀聞所辨甚晰見汾州狐岐山下

壺口龍門辨 禹貢於冀言壺口於雍言龍門兩州分屬夾河對峙後人以河東有龍門縣疑有二龍門非也河東岸古無龍門縣名惟漢之皮氏縣後魏改爲龍門宋改曰

河津縣西北二十五里有龍門山卽壺口之南支而孟門卽龍門之上口在隰州大寧西南與陝西宜川相對錐指云東必得西而始成其爲口西必得東而始成其爲門二語可謂明辨至汾陰縣之西南有平山一名壺口山杜預註潞縣有壺口關長治縣古壺關治有壺口山浮山縣西南有蜀山亦名壺口皆非禹貢之壺口壺口之載於冀州者當以隰州大寧爲正

大同府

大同縣

尹耕四郡考 夫大同之地古雲中九原定襄代郡趙秦漢之所置也趙并代以有代斥胡以有雲中九原而置郡則皆於赧王之十五年於是秦因之爲三郡漢增置定襄爲

四郡夫秦漢時天下不過三十餘郡而北地處其四則夫西北之陬豈止是哉故嘗曰三代以來東南之地漸闢而西北之地漸淪固理勢之自然也今以其故城考之則雲中在勝州榆林五原卽廢豐州代爲蔚廢城定襄在今府城西北皆非今府城也以其屬考之則雲中有咸陽陶林沙南北輿之屬九原有臨沃文國武都曼柏之屬定襄有成樂桐過襄陰復陶之屬代郡有高柳鹵城班氏平邑之屬皆非今所屬也然則今大同者雲中之東境定襄之南境代郡之北境而九原之南鄰也是故合其全則四郡不得不紀指其實則代南境爲太原雲中定襄西北境與九原俱在塞外矣是則考興廢者不可不知也

京東考古錄 世言燕雲十六州白石敬塘以賂契丹不屬

中國者四百四十餘年蓋不盡然考之於史晉高祖所割

以畀契丹者山前之州也曰幽今順天府曰薊今薊州曰瀛今河間府

曰莫今任邱縣曰涿今涿州曰檀今密雲縣曰順今順義縣山後之州九曰

新今保安州曰媯今延慶州曰儒今永寧縣曰武今在朔州西境曰雲今大同府曰應

州今應安州曰寰今馬邑縣曰朔今朔州曰蔚今蔚州而營平二州則後唐

時契丹自以兵取之矣其後周世宗復關南北則瀛莫二州復歸中國而其餘十四州遂淪於契丹并所取營平二州亦適得十六之數若霸州乃周世宗所置灤州乃契丹所置又不在十六州之內者也

周赧王十五年趙置雲中九原代郡 雲中舊城在勝州榆

林縣東北九原舊城在大同西北卽唐改豐州者 趙置

郡復築長城自代並陰山下至高闕爲塞 陰山在朔州



塞外高闕在五原北兩山相對如闕甚高

漢高帝十一年詔曰頗取山南太原之地益屬代代之雲中以西爲雲中郡 十二年分雲中置定襄郡

漢志雲中郡注秦置莽曰受降屬并州領縣十一 雲中注

莽曰遠服 咸陽注莽曰賁武 陶林注東部都尉治

楨陵注緣胡山在西北西部都尉治莽曰楨陸 犢和

沙陵注莽曰希恩 原陽 沙南 北輿注中部都尉治

師古曰闕駟云廣陵有輿故此加北 武泉注莽曰順泉

陽壽注莽曰常得

通典秦雲中郡今雲中單于府是也後魏道武自雲中徙都平城卽此雲中今馬邑郡北平城卽今郡隋雲內縣恒安鎮也 雲中漢舊縣隋曰雲內縣白登山白登臺漢高帝

初被匈奴圍於此有故高柳城叅合陂後魏盛樂縣亦在今郡界單于臺在今縣西北百餘里漢武元封元年勒兵十八萬騎出長城北登單于臺

晉建興元年代公猗盧城盛樂爲北都治故平城爲南都又城新平城於灑水之陽使其子六修居之 魏孝文帝生於平城紫宮

地形志恒州注天興中置司州治代都平城太和中改孝昌中陷天平二年置寄治肆州秀容郡城領郡八 代郡秦置孝昌中陷天平二年置領縣四 平城注二漢晉屬雁門後屬 太平 武周注二漢屬雁門晉罷後復屬 永安 善無郡 梁城郡天平二年置領縣二 參合注前漢屬代後漢晉罷後復屬 裋鴻注一本作祗鴻 繁峙

郡 高柳郡 北靈邱郡 內附郡 靈邱郡 附錄 雲州

注舊置朔州後陷永昌中改寄治并州界領郡四 盛樂

郡注永熙中置領縣二 歸順注永興中置州郡治 還

安注永熙中置 雲中郡注秦置領縣二 延民注永興

中置 雲陽注永熙中置 建安郡注永熙中置領縣二

永定 永樂胥永熙中置 真興郡注永熙中置領縣三

真興 建義 南思胥永熙中置 中有大同地故附錄縣後

後魏天興元年秋七月遷都平城十二月徙六州二十二郡

守宰豪傑吏民二千家於代都 泰常七年九月辛亥築

平城外郭周回三十二里 魏定中山分徙吏民及徒何

種人工伎巧十萬餘家以充京都給耕牛計口受田天興

初制定京邑東至代郡西及善無南極陰館北盡參合為

畿內田其外四方四維置八部帥以監之勸課農耕量校

收入以為殿最又躬耕藉田率先百姓自後比歲大熟匹

中八十餘斛 天賜三年六月發八部人自五百里內繕

修都城 尹耕曰魏畿封東至代則上谷不與西至善無

則五原不與南極陰館則限以雁門北盡參合則舍置豐

勝魏之畿內正與今日大同同也

唐會昌三年三月以雲朔蔚應諸州為大同道罷屬河東置

都團練使領之未幾改防禦使後升為節度

唐志雲州雲中郡有雲中樓煩二守捉城

舊唐志雲州隋馬邑郡東雲內縣界恒安鎮也武德四年平

劉武周六年置北恒州七年州廢貞觀十四年自朔州北

定襄城移雲州及定襄縣置於此 即後魏所都平城 永淳元年為

賊所破因廢

州及縣俱廢

乃移百姓於朔州開元二十年復為

雲州

仍改定襄縣為雲中縣

天寶元年改為雲中郡乾元元年復為

雲州領縣一在京師東北一千九百四十里去東都一千

六百四十二里 貞觀四年四月置雲中定襄都督府

雲中府唐雲州大同軍節度石晉以賂契丹契丹號為西京

宣和三年始得雲中府武應朔蔚奉聖歸化儒媽等州謂

山後九州也

宋慶曆四年十一月遼號雲州為西京置大同府 遼志西

京大同府趙武靈王始置雲中郡秦屬代王國後為平城

縣魏屬新興郡晉仍屬雁門劉琨表封猗盧為代王都平

城元魏道武建都孝文改為司州牧置代尹遷洛改萬年

又置恒州齊文宣廢州為恒安鎮今謂之東城尋復恒州

周復恒安鎮改朔州隋仍為鎮唐武德四年置北恒州七

年廢貞觀十四年移雲中定襄縣於此永淳元年移民朔

州開元十八年置雲中州天寶元年改雲中郡乾元元年

曰雲州乾符三年李國昌為大同軍節度使子雲中守捉

使李克用據州廣明元年奔北地後敗黃巢取雲南既而

與太祖會於雲州之東城後唐同光三年復以雲州為大

同軍節度使晉高祖初割山前代北地為賂大同來屬因

建西京敵樓棚櫓具廣袤二十里門東曰迎春南曰朝陽

西曰定西北曰拱極元魏宮垣占城之北面雙闕尚在清

寧八年建華嚴寺奉安諸帝石像銅像又有天王寺留守

司衙南曰西省北門之東曰大同府北門之西曰大同驛

初為大同軍節度重熙十三年升為西京府曰大同統州

山西通志 卷一百一十一  
二縣七 大同縣本大同川地重熙十七年西夏犯邊析  
雲中縣置戶一萬 雲中縣趙置沿革與京府同戶一萬  
天成縣 長青縣 奉義縣 懷仁縣 懷安縣 弘  
州 德州

按趙武靈王始置雲中郡大同縣本大同川地考據未  
確

遼制大同歲納三司稅錢折粟 重熙十三年升府爲西京  
置留守司十二月己丑幸西京

金天眷元年己酉省西京州縣 皇統元年以燕京路隸尚  
書省西京及山後諸郡族隸元帥府舊置兵馬都部署司  
天德二年改置本路都總管府後更置留守司

元初置警巡院至元二十五年七月改雲州爲大同路隸山

### 西道宣慰使司

明洪武五年七月置山西行都指揮使司 七年秋八月置  
分巡冀北道 二十五年八月城定邊鎮朔衛 永樂六  
年置巡撫都御史 七年置鎮守總兵官大同遂稱鎮  
景泰五年置分守叅議道 天順元年置戶部督餉郎中  
雲中城在北郭外後漢建遼爲西京唐爲雲中郡近又有故  
高柳城參合陂

高山衛城縣西八十里洪武初設衛始築宣德初調附天城  
衛城遂廢今堞堞存

宣寧廢縣在城西北八十里本遼宣德縣置德州昭聖軍金  
廢州改縣曰宣寧隸大同府元因之明省

雲中辨 大同之號雲中郡也兆於後周昉於唐相沿且

千數百載昔蘇秦說燕文侯曰燕西有雲中九原趙武靈王二十六年攘地北至代西至雲中九原又嘗欲將士大夫繇其境直南襲秦是二郡者趙之西界秦之北界也秦置雲中郡漢因之領縣十一治雲中後漢無犢和陽壽以定襄郡之定襄成樂武進隸焉漢末郡廢入新興郡後魏仍置雲中郡領延民縣太平眞君七年以雲中縣屬永安郡之定襄永熙中又置雲陽縣郡本隸朔州改曰雲州此元魏以前雲中郡之大略也今之大同漢雁門郡之平城元魏之代都也代公猗盧六年城盛樂爲北都修故平城爲南都天興初置司州太和中改恒州洎齊天保中州廢爲恒安鎮隸太平縣終魏齊之世不聞以平城爲雲中郡也後周始改太平縣曰雲中隋曰雲內恒安鎮屬焉唐貞

觀十四年自朔州北定襄城徙雲州暨定襄縣來治洎開元二十年改定襄縣爲雲中平城之號雲中於是乎始呂令問賦平城曰雲中古城是也夫秦漢之雲中古城以唐志覈之雲中都護府爲近其地負陰山帶黃河卽元魏之盛樂故都也然元魏之盛樂以爲後漢之雲中郡地則可以爲秦漢之雲中郡城則不可何者范史郡國志凡縣名先書者必郡所治而二漢雲中郡胥治雲中縣以是知盛樂之非雲中故郡也今卽以唐志推之龍朔三年置雲中都護府麟德元年改單于大都護府東北距朔州五百五十七里計其距恒安鎮蓋不翅四五百里而後人乃概號爲雲中亦已疎矣其說兆於後周昉於唐而遼西京志又從而實之謂趙武靈王嘗置雲中郡於此又謂雲中縣趙

置是蓋以唐郡爲漢郡而不知唐之置雲州於恒安鎮與  
僑郡同匪故郡也遼志業以大同爲雲中郡故以奉義爲  
漢陶林懷仁爲漢沙南二縣胥雲中屬也以漢地覈之當  
在平城之西北不當在平城之東南其謬蓋與雲中郡之  
說等又嘗考之唐之中受降城西二百里有大同川其東  
爲故大同城又嘗於朔州鄯陽縣東三十五里置大同軍  
城胥非大同川故地也遼重熙十七年西夏犯邊始析雲  
中置大同縣而遼志云大同縣本大同川地然則古郡縣  
之遷移而寢失其真者又可勝道哉

大同辨 今大同縣漢平城地也魏屬新興郡晉屬雁門  
郡後魏屬代郡隋爲雲內縣初屬朔州後屬馬邑郡有純  
真山白登山武周山有隰水

見隋志

唐貞觀置定襄縣尋廢

開元復置縣曰雲中爲雲州治遼析雲州置大同縣金元  
以後皆無異名周遼志暨明一統志山西舊通志皆指縣  
地爲大同川地考唐書中受降城西二百里大同川有天  
德軍大同川之西有天安軍皆天寶十三載置天德軍乾  
元後徙屯永濟柵故大同城也元和九年李吉甫奏修復  
舊城北有安樂戍此皆在長城之外距今縣七百餘里舊  
志胥悞

唐鎮北大都護府有大同長寧二縣非此大同  
懷仁縣

漢志涅陶注孟康曰音汪屬雁門郡 續漢志雲中郡沙南  
縣有蘭池城

遼志西京奉義縣本漢陶林縣地後唐武皇與太祖會此遼

析雲中置戶三千 懷仁縣本漢沙南縣元魏葛榮亂縣廢隋開皇二年移雲內於此大業二年置大利縣屬雲州改屬定襄郡隋末陷突厥李克用敗赫連鐸駐兵於此遼改懷仁在京南六十里 遼析雲中縣地置懷仁縣因太祖與晉王李克用面會東城取懷想仁人之義

隋志定襄郡註開皇五年置雲州總管府大業元年府廢統縣一大利註大業初置帶郡有長城有陰山有紫河

按此則大利當在朔州左雲北懷仁要隸雲內縣地也 遼史尚宜覈

舊志懷仁漢置沙南縣後魏廢隋大業初置大利縣遼析雲中縣地置懷仁縣金升雲州元復名懷仁隸大同路

國朝併安東中屯衛於縣分八里三佃一所雍正四年又併

大同前衛八村於縣名前衛里

懷仁辨 遼志懷仁卽漢沙南按沙南在漢屬雲中郡今大同乃雲中東境也後人誤以平城爲雲中郡指隋後之疆域爲兩漢疆域宜其多舛懷仁在大同府西南七十里與漢雁門郡之涅陶爲近沙南見桑欽水經河水又東過雲中楨陵縣南又東過沙南縣北從縣東屈南過沙陵西今歸化城有沙陵湖則沙南應更在沙陵之北又考懷仁北郭外有北沙河南郭外有南沙河卽舊志所謂沙泉也然此泉自明季始著不得據以解漢之沙南而桑乾枝水俗名南池池北有涅陶縣之故城在十五里內

山陰縣

山陰漢陰館地北魏屬神武郡北齊改太平郡隋置神武縣

屬馬邑郡唐廢遼置河陰縣屬應州金改山陰置忠州元仍山陰至元二年併金城入尋復置明隸大同府應州今則直隸大同府

按山陰卽河陰以在桑乾河南曰河陰在復宿山北曰山陰

### 應州

漢志雁門郡秦置句注山在陰館莽曰填狄屬并州領縣十四善無注莽曰陰館沃陽注鹽澤在東北有長城西  
部都尉治莽曰敬陽 疆陰注諸聞澤在東北莽曰伏陰  
中陵注莽曰遮害 陰館 埒注莽曰填狄亭 繁峙  
樓煩 武州 涅陶 劇陽 崞 平城 馬邑  
後漢志雁門郡十四城 陰館 繁峙 樓煩 武州 涅

陶 劇陽 崞 平城 埒 馬邑 鹵城 廣武 原  
平 疆陰

後魏屬神武郡北齊屬太平郡後周郡廢置陰城縣隋廢唐置金城

遼志應州彰國軍上節度唐武德中置金城縣後改應州

首雁門二山南北相應故名後唐明宗州人也天成元年升彰國軍節

度興唐軍寰州隸焉遼因之北龍首山南雁門兵事屬西京路部署司統縣三 金城本漢陰館縣地漢末廢爲陰

館城大業末陷突厥唐始置金城縣遼因之 渾源縣  
河陰縣本漢陰館縣地初隸朔州清寧中來屬

河陰卽山陰

遼開泰三年三月戊申雲應朔州置轉運使

元志唐末置應州後唐升彰國軍元初仍爲應州領金城山



陰二縣至元二年山陰併入金城後復置州治在金城  
鹵城在州境漢為鹵城縣隸代郡後漢隸雁門郡 明洪武  
七年以州隸大同府

國朝順治十六年裁安東中屯衛併應州領山陰縣今山陰  
則直隸大同府

渾源州

趙孝成王十九年以汾門與燕易平舒渾源乃肇於平舒  
漢為平舒崞二縣地平舒屬代郡莽曰平葆崞屬雁門郡莽  
曰崞張

元魏神武郡石城縣隋為平寇縣唐為崞縣屬代州後唐置  
渾源縣以渾源川名或云因八水合而渾流故名屬應州  
遼仍舊金升為州仍置縣在郭下併置司候司元改恒陰

縣隸西京即今大同府至元四年省入州明調安東中屯衛中

前二所分守

尹耕三曲陽辨 按漢地里志曲陽有二一曰上曲陽屬常

山郡注曰在恒山北谷即禹貢恒水所出處有恒山祠一

曰下曲陽屬涿鹿郡注曰今鼓聚昔陽亭晉荀吳滅鼓即

此常山有上曲陽故此加下今正定府復有曲陽縣既非

鼓聚又不在恒山北谷是三曲陽也攷定州志曰曲陽即

秦所志曲逆後因之有曲逆溪在城北曲而西流漢地里

志曰曲逆屬中山國蒲水所出東入濡又曰濡水在城北

曲而西流故曰曲逆章帝醜其名改曰蒲陰則今之曲陽

為漢之曲逆明矣今曲陽既為曲逆則恒山祠古在上曲

陽不在今曲陽也舜北巡守曰至於北岳漢武修封還至

上曲陽祀恒山皆不在今曲陽也飛石之說胡爲者哉故嘗斷之曰上曲陽以山得名言在恒山之陽也曲逆以水得名言其水之曲流也上曲陽旣在北谷山行峻絕其廢遂久曲陽曲逆同而轉逆爲陽後人以其去岳遠而無徵復爲飛石之說以文之唐人失河北石晉割燕雲宋人守正定咸不能至岳下奉玉帛而且便其在曲陽也經千年無更正之者則夫表峙鎮之方備柴告之典復唐虞會同之跡不有待於今日耶若必求上曲陽遺址祠之則唐虞秦漢都平陽關中車馬自西南而來入山而北故於山陽之谷建邑置祠今冠蓋俎豆率自北而南亦何必谷中之上曲陽也修岳麓掃土之遺正曲逆飛石之謬於渾源州可也

### 靈邱縣

魏天平二年置恒州靈邱郡又置北靈邱郡領靈邱莎泉二縣

隋書後魏置靈邱郡後齊省莎泉縣入焉後周置蔚州又立大昌縣開皇初郡廢縣併入焉大業初州廢靈邱屬雁門郡

唐蔚州與唐郡本安邊郡雁門郡之靈邱上谷郡之飛狐縣地唐初沒突厥武德六年置州并置靈邱飛狐二縣僑治陽曲七年僑治繁峙八年僑治秀容故北恒州城貞觀五年破突厥復故地還治靈邱開元初徙治安邊至德二載更郡名復故治領靈邱飛狐興唐三縣 東北有橫野軍乾元元年徙天成軍合之而廢橫野軍西有清塞軍本清

塞守捉城貞元十五年置

按魏置北靈邱郡在梁大同元年時猶未名蔚州也後周改靈邱郡爲蔚州隋乃以縣隸州金爲成州元明俱隸蔚州縣西北有唐河出高是山周職方并州川曰嘔夷是也

宋起鳳靈邱辨 靈邱之見稱於孟氏註已明釋其爲齊下邑也按是邑在周慎靚王二年齊已命名以今輿地考之當隸山左其建置廢革山左屬邑自有成書不具論獨是疑者或謂今之邑其齊地之舊乎或謂邑之名同時有兩稱乎皆非也攷周威烈王二十三年戊寅晉大夫魏斯趙籍韓虔三分晉地爲諸侯邑時爲趙西北邊尚未有邑在威烈王二十三年之前猶屬晉其明年屬趙明矣齊地之

廣無逾趙之中山燕之易水而至雲中上谷間者是說也可以無辯而同時兩邑之議不容無言子輿責蜺鼃之辭靈邱蓋慎靚王時齊有是邑趙固未嘗設也至周赧王八年甲寅趙始傳及武靈與肥義謀易服騎射雖中爲公子成諫止然數出境游獵卒葬此終未置邑中間歷秦楚垂九十九年漢高帝興乃於十一年乙巳冬命太尉周勃入代擊陳豨豨乃奔此破其軍因有武靈之邱始置邑名焉由漢高遡周慎靚王相去凡一百一十有五年前此百餘歲而以靈邱獨顯者齊邑也後此百餘歲而以靈邱並著者漢邑也地隔千餘里世易四五姓名雖同而跡則異豈得以齊誣趙並以趙誣漢乎故不可無辯

廣靈廣昌靈邱三縣明皆隸大同府蔚州在周秦漢胥

爲代地

國朝改蔚州屬宣化而三縣仍隸大同府爲紫荆倒馬二關  
出入要地

廣靈縣

廣靈卽漢之延陵唐爲安邊縣又改興唐縣屬蔚州後唐同  
光二年契丹寇蔚州始置廣陵縣元改廣靈

廣昌縣

廣昌縣前漢隸代郡注云涑水東南至容城入河過郡三行  
五百里并州寢莽曰廣屏隋改名飛狐屬上谷郡唐飛狐  
與靈邱興唐同隸蔚州宋升爲飛狐軍遼復爲縣至明方  
復名廣昌崇禎間更爲廣川州兼治靈邱廣昌二縣尋復  
舊今縣因舊名而飛狐口仍爲要地

無終卽今玉田去廣昌越七八百里舊通志縣志指廣  
昌爲古無終地宜覈

日知錄春秋時代尚未通中國趙襄子乃言從常山上臨代

代可取也正議曰地道記云恒山在上曲陽縣西北百四

十里北行四百五十里得恒山吸號飛狐口北則代郡也

水經注引梅福上事曰代谷者恒山在其南北塞在其北

谷中之地上谷在東代郡在西此則今之蔚州乃古代國

項羽徙趙王歇爲代王歇更立陳餘爲代王漢高帝立兄

劉仲爲代王皆此地也今蔚州東二十里相傳有代王城十年陳豨反十

一年破豨立子恒爲代王都晉陽高祖紀則今之太原縣矣

孝文紀則云都中都陳豨傳同而文帝過太原復晉陽中都二

歲如淳以爲先都又立子武爲代王都中都則今之平遙

縣矣

正義引括地志中都故城在汾州平遙縣西南十二里

又按衛綰代大陵人大

陵今在文水縣北而屬代代中都故也代凡三遷而皆

非今代州今代州之名自隋始

### 陽高縣

陽高古雲內雲中地也金曰長清後改白登元亦曰白登至

元二年廢為鎮尋復明洪武中廢入大同縣築陽和城天

順二年置衛領以指揮千戶

國朝順治三年併高山衛為一衛曰陽高衛掌印一員領之

裁指揮千戶五年移府治於陽高城衛升為府八年復舊

雍正三年改為陽高縣距大同府治百二十里

### 天鎮縣

天鎮為晉魏之廣牧縣與唐之天成軍相近後唐為雲中縣

地遼析置天成縣隸西京大同府元隸宣德府明洪武改

設天城鎮遠二衛

國初併為天鎮衛雍正三年改為縣距大同府治百八十里

按明一統志大同府城西北二十八里有定襄城漢郡

唐縣皆治此今陽高天鎮在府治二百里內當即唐雲

內之恒安鎮北恒州也陽高志長青縣有青坡山即今

雲門山陽高亦長青縣地此說近是又傳天鎮為唐玉

泉驛與古榆林縣近云

### 朔平府

朔平府界辨 左雲右玉明洪武二十五年始設衛置屯

永樂七年復調大同左右二衛於其地正統間以邊外玉

林併入右衛雲川併入左衛平魯在明為老軍營成化十

七年始設

國朝雍正三年乃置朔平府而三衛俱改為縣與朔州同隸焉北魏延和二年始置懷朔鎮於定襄故城後改名朔州在今州北三百八十里後廢北齊天保六年復置在今州南四十七里新城後徙馬邑隋唐俱置馬邑郡治鄯陽鄯陽即元魏桑乾郡地也宋徽宗時置朔寧府而內附不久遼置順義軍領縣或二或三不止今州治地也又今朔州即古馬邑郡而馬邑後自設縣云

按朔平府逼近邊城北通沙漠東燕西秦為晉省咽喉要地漢唐以後分郡置州代有更易與大同府地大率相通爰考古名附後

朔方考 朔方今寧夏以北地漢武帝置朔方郡順帝徙

朔方治五原北魏延和二年於漢之五原郡置鎮後改懷朔孝昌中改為州朔州之名始此然非漢朔方地也五原城在隋置勝州榆林縣之西唐後仍郡名而漸徙於東北長城外有無定河即奢延水一曰朔方水與今朔州相距甚遠

豐州考 豐州在戰國屬趙秦九原漢五原郡地五原郡城在榆林郡界後漢及魏晉漸淪沒隋文帝時因舊永豐鎮改縣置州豐州之名始此煬帝廢州置五原郡唐貞觀四年以居突厥降戶置豐州亦在五原郡即後周之永豐鎮也在黃河西不領

縣十一年州廢天寶中改九原郡領九原永豐二縣景龍二年朔方軍總管張仁愿築三受降城後唐改天德軍遼更名應天軍復為州領二縣富民縣本漢朔方郡臨戎縣

有黑山神振武縣本漢定襄郡盛樂縣負陰山帶黃河卽元魏所都也宋初攻契丹得之後沒於西夏徙置府州地名曰寧豐金初仍豐州領縣二後改天德軍總管府大定中析豐州置淨州領天山縣元復爲豐州舊有錄事司及富民縣至元中以大同平地縣入焉明初置玉林雲川等衛後棄於外今由右玉殺虎堡出口西北二百四十里爲歸化城城東五十餘里藏經塔有金天輔中碑城中都統署有元延祐中碑皆刻豐州據此則金元之豐州卽在歸化城左右隋唐之豐州五原本在河西遼乃改置河北遼志云豐州有大鹽灤九十九泉沒越灤古磧口非豐州故地也歸化城東北有水名豐灘遶城而西曲注黃河唐書三受降城俱列豐州而豐州之九原永豐二縣或省

入勝州之河濱或省入靈州之懷遠或省入延州之豐林此胥指河西豐州非河東豐州也

西受降城在豐州西北八十里 高闕塞在豐州河之西史記趙築長城自代傍陰山下至高闕卽此 稠陽塞亦在豐州漢稠陽縣屬五原郡漢書竇憲出雞鹿塞鄧騭出稠陽塞遂至燕然山 豐州境內有黑山官山七寶山有紫河黑河

勝州考 勝州戰國趙地秦爲雲中九原漢爲雲中五原史記秦却匈奴樹榆爲塞州南故有榆溪塞隋初置勝州

治榆林縣勝州之名始此煬帝廢州置榆林郡唐爲勝州

榆林郡

元史唐東受降城南直榆林後因濱河徙置綏遠峰南卽今東勝州是也 城在東勝州東北八里

東南距朔州四百里

領縣二榆林縣卽漢河南縣地有故雲中城拂

雲堆金河紫塞河自馬邑郡鄯陽縣流入有榆林關縣西  
有漢五原城河濱縣亦即漢河南縣地東臨河岸明一統志縣在

大同西五百餘里本隋榆林縣地唐析置此縣縣東北有河濱關 遼史所載畧同而太祖

神冊元年破後唐振武軍勝州之民皆趨河東州廢後石

晉割地復置勝州是遼之勝州先在河西後在河東故大

同紀曰遼以唐勝州在河西乃加東字也唐決勝州在河

南按即勝州為明河套地杜佑李吉甫說甚明元史金初屬西夏後

復取之元至元二年省寧邊州之半入焉舊有東勝縣及錄事司四年省入州寧邊州在東勝州東南三百里遼

置州金置鎮西軍元乃省入武東勝二州今黃河西來遼東受降城而南注其

所經即故東勝地在歸化城之西平魯縣西北口外有明

玉林衛城亦與勝州相近云

東勝州境內有金河泊承紫河入黃河又有君子津

雲州考 秦漢有雲中郡晉為新興郡北魏道武自雲中

徙都平城即雲州地即今大同孝文遷洛改為司州牧又置恒

州北齊文宣廢州為恒安鎮後周曰雲中隋開皇初置馬

邑郡雲內縣唐武德中於故雲內之恒安鎮置北恒州七

年廢今朔平在恒州之西貞觀十四年復置自朔州北定襄城徙治

定襄縣永淳元年為默啜所破徙民於朔州開元十八年

復置更名雲州雲州之名始此有陰山道青坡道皆出兵

路也後魏築雲州城永熙中寄治并州界今名雲州村在文水縣東四十里非此雲州 遼為西京

析雲中置雲州於懷仁縣地為雲西雲西之名始此金置

總管府元為大同路領大同白登宣寧平地懷仁五縣至

元二年以平地縣省入豐州今右玉縣東至大同府北至

歸化城約二百里似屬豐州地左雲縣疑即雲西地云



山西通志 卷一百一十七  
明一統志云州境內有拂雲堆考唐書中受降城有拂雲堆祠接靈州境

雲內州考 唐於雲中郡置都督府後改橫塞軍又移天

德軍卽中受降城地遼初爲開遠軍置代州北雲朔招討

道宗清寧初改雲內州雲內州之名始此領柔服寧人二

縣有威塞軍此在唐爲積塞軍古可敦城大同川天安軍永濟柵

安樂戍拂雲堆在黃河東西壩金仍爲雲內州領柔服雲

川二縣及寧人鎮元廢雲川縣設錄事司至正四年省司

縣入州按朔平誌謂今歸化城西南脫脫城北有舊城址

古塔石柱刻金正隆中雲內州錄事司郭說字云

雲內州西有天瑞泊又有紫河黑河經流明一統志云雲

內州有居延川一名居延澤在朔州北按此澤在甘州極

北距朔州甚遠恐係兩地

朔平全郡在雲中五原定襄雁門之界右玉在豐淨二州

之界左雲在雲州雲西之境平魯在豐勝雲內寧邊州之

界歸化城兼豐淨雲內東勝之地朔州卽漢雁門之馬邑

隋唐之鄯陽今馬邑北魏廣武平原齊朔州北道行臺隋

鄯陽地唐開元中析鄯陽東三十里卽大同軍附郭置馬

邑縣南至朔州四十里卽今縣也

朔平志謂洪武二十八年立大同五衛迤東五衛東勝五

衛永樂間徙東勝中前後三所千戶於懷仁等處此亦未

覈至東勝五衛在大同西北今邊外三十五里有玉林舊

城其西有紅城黑城脫脫城三地城垣尚存云

右玉縣

漢建武二十年冬省五原郡徙其民

宣帝甘露元年單于呼韓邪入朝自請願留居光祿塞下矢志保受降城許之命董忠韓昌將兵送之因留衛單于助誅不服贍給其穀米三萬餘

晉安帝元興元年魏居越勒莫弗部於五原

唐太宗貞觀四年既禽突厥頡利降其衆十餘萬盡居之內地於豐勝靈夏朔代之間

### 朔州

正義括地志云趙武靈王長城在朔州善陽縣北按水經云百道長城北山上有長垣若頽毀焉沿溪亘嶺東西無極蓋趙武靈王所築也

通典秦代郡今安邊及馬邑之北境皆是 漢有定襄郡在

### 今馬邑郡地

通典晉懷帝時劉琨表以鮮卑猗盧爲大單于封代公徙馬邑卽其地也其後稱魏建都今於郡地兼置懷朔鎮及遷洛後遂於郡北三百餘里置朔州葛榮之亂又廢北齊復置朔州隋初置總管府煬帝初府廢置代郡尋屬馬邑郡後魏初雲中在今郡北三百餘里定襄故城北齊置朔州在故都西南新城一名平城後移於馬邑卽今郡城也

地形志恒州善無郡天平二年置領縣二 善無 沃陽

魏有六鎮沃野懷朔武川柔元懷荒禦夷 附錄 朔州本漢

五原郡延和二年置爲鎮後改爲懷朔孝昌中改爲州後陷今寄治并州界領郡五 大安郡領縣二 狄那 捍殊 廣寧郡領縣二 石門 中川 神武郡領縣二

尖山 殊頽 太平郡領縣三 太平 太清 永寧

附化郡領縣四 附化 息澤 五原 廣牧中多朔州地

梁普通三年魏主詡居柔然於懷朔之北 五年八月魏東

西部勅勒皆叛附拔陵乃改懷朔鎮為州

元帝承聖二年齊主居柔然於馬邑川

周建德六年二月北朔州置總管府

隋志馬邑郡注舊置朔州開皇初置總管府大業初府廢統

縣四 善陽注後齊置縣曰招遠郡曰廣安開皇初郡廢

大業初縣改曰善陽置代郡尋曰馬邑又有後魏桑乾郡

後齊以置朔州及廣寧郡後周郡廢大業初州廢 神武

注後魏置神武郡後齊改曰太平後周罷郡有桑乾水

雲內 開陽

隋文帝開皇十九年突厥突利入朝立為啟民可汗築大利

城於朔州以居之

唐朔州馬邑郡本治善陽建中中節度使馬燧徙治馬邑後

復故治領二縣善陽注武德四年省常寧縣入焉馬邑注

開元五年析善陽於大同軍城置

舊唐志朔州善陽漢定襄地有秦時馬邑城武州塞後魏置

桑乾郡隋為善陽縣

水經注石門鄣西北光祿城即懷朔鎮城也 中陵水又西

北流逕善無縣故城西王莽之陰館也

十三州志曰舊定襄郡志地理志曰雁門郡治

宋志朔州唐置後唐為振武軍石晉以賂契丹宣和五年守

將韓正以州來降金人尋逐正復取之

山西通志 卷一百一十七  
元志唐改馬邑郡爲朔州後唐升鎮武軍宋爲朔寧府金爲朔州元因之

按漢善無前屬雁門後屬定襄皆係郡治魏天平二年置善無郡善無沃陽二縣屬焉在勾注山之西北與朔州爲近

馬邑縣

漢志雁門郡劇陽註莽曰善陽 馬邑註莽曰章昭

秦時築城於武州塞內名馬邑搜神記晉地記師古註章懷注皆同按今朔州卽古馬邑其故城在今州東今之馬邑非古馬邑也

漢太原郡之廣武縣城在今治南 後唐天成三年置寰州

治寰清縣卽今馬邑縣境

左雲縣

大同紀漢建武十三年盧芳奔四郡歸正省定襄徙其民於西河漢書以省定襄爲十年事按芳竊據諸郡十年芳未破也何以得省必芳奔而始經理邊郡也 二十七年太尉趙熹典邊事上言請復緣邊諸郡乃復置五原定襄郡平魯縣

漢文帝十一年夏募民實雲中 十二年三月募民輸粟雲中

晉咸康五年三月代王什翼犍立遷於雲中 大元十六年魏主珪居北部柔然於雲中 元興二年魏居尉遲部萬餘家於雲中

唐永徽元年九月置單于都護府 時同置瀚海都護府領

山西通志 卷二十七 一  
金微新黎等七都督仙萼賀蘭等八州三年復徙瀚海都  
護府於雲中爲雲中都護府積以北蕃州隸瀚海以南隸  
雲中 景龍二年三月置三受降城

尹耕曰按單于都護府置在雲中今瀚海都護府復曰徙置  
雲中是雲中有兩都護府也考之史李靖破突厥遷三百  
帳於雲中阿史德氏爲之長後部落漸衆議立可汗帝曰  
今可汗古單于也乃更爲單于都護府是單于都護專統  
遷戶而瀚海之徙雲中者則統積南蕃州雖同城而職任  
異也或曰瀚海所徙史文曰古雲中單于府所置但曰雲  
中是其時有兩城也單于置於新城瀚海徙於舊城不相  
妨也一統志曰新雲中在今大同城北郭外古雲中在豐  
勝之間相去四百餘里理或然也

歸化城

大青山祁連山陰山陽山等地通辨 歸化城在遼金元  
豐州之域其西有陰山陽山大青山北通瀚海南臨黃河  
秦使蒙恬北擊胡渡河取高闕據陽山北假後漢五原郡  
西安陽北有陰山武帝克匈奴因置陰山縣徐廣謂陰山  
在河南陽山在河北水經注鍾山卽陰山又曰陽山卽陰  
山元延祐修道碑又謂大青山卽天山卽祁連山明一統  
志大青山卽陰山是諸山名雖異而實同也按石祿山之  
西爲陰山山東南爲東受降城陰山之西爲陽山更西爲  
大青山山東南爲中受降城西南爲西受降城城西越長  
寧河阿保之南卽賀蘭山也至甘州爲漢張掖郡窮石之  
東爲焉支山肅州爲漢酒泉郡高臺之南爲祁連山此皆

山西通志 卷一百一十七  
在嘉峪以東至於伊州之北爲天山其西爲柳陳城更西  
爲高昌卽明火州爲漢車師唐交河蒲類兩縣地是天山  
與祁連已東西判然矣金時以邊外稱天爲祁連置靜州  
天山縣遂名大青爲祁連而元亦因之宜覈水經注山在  
中國之極北故名陰山水北曰陽山在河水之北故亦謂  
之陽山以此正徐廣陰山在河南一語之誤誠是矣然河  
自明季三部落之西北轉逕大青山之陰其南有馬陰山  
山以東卽周朔方漢朔方郡及明河套故地水經所云河  
水又南逕馬陰山西是也徐廣之所謂陰山在河南庸或  
指此山乎抑宜覈

按輿地有名異而實同者如條山蒲山雷首山之類是  
也有名同而實異者如長城外有賀蘭山朔州右玉亦

胥有賀蘭山肅州有祁連山大青山亦名祁連山五寨  
別有祁連池又如大同虞鄉孟縣胥有方山潞安大寧  
浮山胥有壺口山遼州武鄉平陸黎城胥有箕山永濟  
長治胥有首陽山介休平定州胥有綿山此類甚多當  
析觀之

青冢辨 青冢漢明妃墓也宋遼以來諸史多言青冢今  
在歸化城南十餘里黑河之側夫歸化城漢五原郡地距  
幕北絕遠而宋史云太平興國八年豐州刺史王承美敗  
遼師追北至青冢百餘里遼史神冊元年八月太祖拔朔  
州勒石記功於青冢之南西京志亦云豐州有青冢元史  
太祖十四年駐軍青冢繇東勝渡河收西夏合諸史覈之  
其地胥近歸化城此又何說也按漢史甘露元年呼韓邪

欵塞願留居光祿塞下保漢受降城而北邊息警者六十餘年豈其時王欵輩實導之而遂克返葬與抑好事者艷青冢之名鑿空駕虛流傳至宋遼遂援爲典要與老杜云一去紫臺連朔漠獨留青冢向黃昏曰一去曰獨留似有疑辭間嘗詢之商旅塞草皆黃未聞此冢之獨青也然則志其名無鑿其地可也

山西通志卷第一百七十七

山西通志卷第一百七十八

山西巡撫都察院右副都御史臣覺羅石麟奉

旨修輯

辨證 三

寧武府

寧武縣

樓煩見周王會圖

史記趙世家武靈王行新地遂出代西遇樓煩王於西河而致其兵言致其人而用之也是以楚漢之際多用樓煩人別爲一軍高祖功臣侯年表陽都侯丁復以趙將從起鄴至霸上爲樓煩將而項羽本紀漢有善騎射者樓煩

煩胡也今樓煩縣

則漢有樓煩之兵矣灌嬰傳擊破柘公王武斬

應邵曰樓

樓煩將五人攻龍且生得樓煩將十人擊項籍軍陳下斬  
樓煩將二人攻黥布別將於相斬樓煩將三人功臣表平  
定侯齊受以驍騎都尉擊項籍得樓煩將則項王及黥布  
亦各有樓煩之兵矣 史記武靈王破林胡樓煩築高闕  
塞

按林胡樓煩在今寧武府西北及岢嵐州東北地高闕  
塞在今歸化城西北

漢志太原郡汾陽注北山汾水所出西南至汾陰入河過郡  
二行千三百四十里冀州寢 雁門郡樓煩注應劭曰故

樓煩胡地 武州注莽曰桓州

後漢志雁門郡武州注武帝誘匈奴入武州塞 雁門郡樓  
煩

按地形志潁州汝陰弋陽三郡南兖州下蔡郡均有樓  
煩非此樓煩也

隋大業四年置樓煩郡

唐武德四年置北管州六年併入嵐州號嵐州樓煩郡 龍  
紀元年置憲州

龍紀中李克用表置天池縣宋熙寧中省城在靜樂縣北  
襄陽城在縣北九十里寧化軍南八十里址少存

按天池管涔山在寧武少南而嵐谷卽寧化所地故尹  
耕曰北管廢則寧武入於嵐合之唐地理志寧武靜樂  
皆樓煩也

北漢乾祐五年二月置寧化軍於嵐州界又置雄勇鎮於其  
北備周師也



山西通志 卷一百一十八  
宋太平興國五年置寧化軍屬有寧化縣熙寧三年廢縣元祐元年復崇寧三年又廢爲鎮

金大定三年升爲寧化州

寧武府界辨 寧武古樓煩國樓煩城在靜樂縣南七十里一在崞縣或云在西百里馬家莊要之靜樂寧武皆樓煩地也寧武在宋爲寧化軍金爲寧化州領寧化一縣乃明寧化所也靜樂東北百六十里有管涔山唐置管州於此靜樂永安鎮與寧武接界兩縣治相距百八十里東八十里爲朔州寧武北三十里卽神池縣治有虎北等山官莊狼窩等村隸焉神池西八十里卽五寨縣治有店坪等山小辛下莊等村隸焉五寨在靜樂西北距五寨荷葉坪山界凡百里由五寨而北百四十里卽偏關縣治東至老

營所西北至草地邊牆均八十里而偏關西南卽保德州

河曲縣治也寧化所在永安鎮北與寧武所相距四十里

神武在今神池縣地武州在今五寨縣地

偏關縣

偏關有韓光寨東五砦西三井昔傳元將韓光所築

按北漢天會元年置偏頭砦於韓光嶺之上卽今偏頭關城也金有寒光堡是韓光之名著久矣至於韓光築寨史傳無考恐涉附會

神池縣

神池古鄯陽地 古鄯陽今朔州朔州西南今神池周赧王十九年秦使蒙鶩拔趙新城狼孟

遼志武州神武縣魏置晉改新城後唐太祖生神武川之新

城卽此初隸朔後置州併寧遠爲一縣來屬

唐憲宗元和三年居突厥別部沙陀朱邪盡忠於五原其人  
勇而善鬪每爲回紇所苦故盡忠與子執宜率衆內附後  
以五原近回紇遂徙之定襄賜國姓

括地志新城一名小平城在朔州鄯陽縣西南狼孟縣名在  
曲陽北

尹耕曰平城有三皆在冀北一曰平城古城也漢高圍白登  
之所至者爲今大同一曰新平城拓跋猗盧新城也其子  
六修之所居者在今馬邑縣北一曰小平城亦古城也秦  
蒙鶩之所拔者今神池稍南寧武關地也小平城見吞於  
秦而兩漢無聞新平城見據於六修而魏不復見獨平城  
爲魏都後復爲鎮稱京置府至今顯焉

據此則今神池稍南寧武關地卽小平城秦蒙鶩所拔  
者也

### 五寨縣

闕駟十三州志善無縣南七十五里有中陵縣世祖建武二  
十五年置

水經注武縣在善無西百五十里北俗謂之太羅城水亦籍  
稱焉

咸平五年十二月遷麟州內屬人於樓煩

遼志朔州武州宣威軍下刺史趙惠文王置武州塞魏置神  
武縣唐末置武州後唐改毅州遼重熙九年復武州號宣  
威軍統縣一卽神武縣也

武州城在岢嵐州北百一十里朔州西南百五十里本趙武

山西通志 卷一百一十八  
州塞漢為雁門郡武州縣晉改為新城後唐李克用生神武川之新城即此遼金曰武州治寧遠縣明初仍置州隸大同府後革今城存鎮西為屯留堡

元武州註唐隸定襄馬邑二郡遼置武州宣威軍元至元二年割寧邊州之半來屬舊領寧邊縣及司候司四年省入州

按漢所築武州城在境內自明洪武九年遷今城武州遂廢今為武州村

澤州府

鳳臺縣

漢志高都注莞谷丹水所出東南入泝水有天井關屬上黨郡

後漢志註國策夏季居天井即天門也博物記縣南地名即垂陽阿侯國同屬上黨郡

地形志建州註慕容永分上黨置建興郡真君九年省和平五年復永安中罷郡置州治高都城領郡四 高都 長

平 安平 泰寧 高都郡註永安中置領縣二 高都 註漢晉屬上黨後屬 陽阿注二漢屬上黨晉罷後復屬

有武斬關

隋志長平郡丹川註舊曰高都後齊置長平高都二郡後周併為高平郡開皇初郡廢十八年改為丹川大業初置長平郡有太行山

唐本治濩澤武德八年徙治端氏貞觀元年徙治晉城天寶二年更郡名高平

唐志高平郡晉城註本丹川武德元年置建州三年析丹川置晉城以隸之六年州廢隸蓋州徙州來治九年省丹川蓋城入晉城貞觀元年州廢以晉城高平陵川來屬天祐二年更曰丹川南有天井關一名太行關

宋澤州亦號高平郡屬河東道開寶四年析澤州直屬京

金元光元年升爲節鎮軍曰忠昌二年升節度使

元志金爲平陽府元初置司候司及領晉城高平陽城沁水端氏陵川六縣至元三年省司候司陵川縣入晉城省端氏入沁水後復置陵川領五縣

澤州界辨 澤州爲晉東南要地秦曰上黨高都後魏曰建州後周曰高平隋曰澤州曰長平唐曰蓋州宋屬河東元屬平陽明爲澤州東界河南衛輝府輝縣南界河南懷

慶府河內縣西界平陽府翼城縣北界潞安府長子縣隋唐以來雖頻徙郡州治而分割入他郡者殊少金以州隸潞州昭義軍後改隸孟州而終復昭義其揆一也

按秦漢之置縣後魏之建州北齊之置郡皆在高都今治東三十里有高都城卽唐之晉城故縣隋丹川故縣在府治內卽後周之高都縣漢陽阿故縣在治北大陽鎮卽魏之建興郡也相傳晉太始元年有鳳集高都之北故今以名縣云

### 高平縣

漢志注泣氏楊谷絳水所出南至墜王入沁應邵曰山海經泣水所出者也

後漢志泣氏有長平亭注白起破趙長平上黨記白城在郡

南山中百二十里

晉永興五年劉曜取泫氏

地形志建州長平郡領縣二 高平注永安中置治高平城

泫氏注二漢晉屬上黨郡治有羊頭城

泫氏故城見水經注卽後魏析泫氏置高平縣也今王報村人稱廢縣

隋志注舊曰平高齊末改焉又併泫氏縣入焉有關官

唐武德初置蓋州城天寶間廢卽今米山鎮

唐初隸蓋州後隸澤州有泫水一曰丹水有省窵谷北有長

平關

高平辨 今隸澤州之高平二漢晉爲泫氏縣屬上黨郡

治山海經所謂泫水所出是也北魏建州長平郡永安中

置領縣二治元氏城時分元氏置高平高平之名見於晉者止此而地形志載四高平兖州高平郡卽故梁國漢景

帝分爲山陽國武帝改爲郡晉武帝更名領縣四有高平

二漢屬山陽晉屬前漢橐也後漢章帝更有洸水千秋

城胡陸城齊城高平山承雀山伏羲廟東楚州高平郡治

大徐城領縣四有高平乃武定七年改蕭衍東平陽平清

河歸義四郡置也南建州高平郡領縣四有高平蓋魏因

蕭衍所置治高平城也原州高平郡領縣四有高平蓋太

延二年置鎮正光五年乃改置州并置郡縣治高平城也

計其地或在山東或在江西或在江南徐州或在陝西固

原均非漢之泫氏泫氏地又半屬陵川不可以不辨

陽城縣

路史臣瓚之世本禹都陽城在大梁之南今陳留浚儀故寰  
宇記登封古郛城引地理志潁川陽城爲禹都非也乃澤  
之陽城堯舜皆居河東北不居河南

漢志濩澤注禹貢析城山在西南應劭曰有濩澤在西北  
後漢志濩澤侯國有析城山

地形志安平郡濩澤注二漢屬河東晉平陽後屬

建州泰寧郡注孝昌中置及縣領縣四 東永安 西河

西濩澤 高延以東永安西濩澤附錄

隋志有嶠嶢山濩澤山

唐初澤州治濩澤城尋移州端氏天寶元年更濩澤爲陽城  
天祐二年更曰濩澤

金元光二年升爲勸州有王屋山濩澤

十道記澤州以濩澤得名

按舊志澤州城勸州城陽陵故驛卽今縣治

水 陵川縣

舊唐志陵川漢泫氏縣隋改陵川武德初屬蓋州貞觀元年

隸澤州卽蓋州更名

按高平乃漢泫氏縣地而縣治實在陵川也今高平縣  
北二十餘里王報村有泫谷水

隋與丹川沁水端氏濩澤高平同屬長平郡開皇十六年置

陵川

元至元二年省入晉城後復屬

沁水縣

漢志河東郡端氏 後漢注史記韓趙魏分晉封晉端氏

山西通志 卷一百一十八  
河內郡沁水

地形志建州安平郡領縣二 端氏 濩澤端氏註二漢屬

河東晉屬平陽後屬真君七年省太和二十年復

隋志沁水註舊置廣寧郡後齊郡廢縣改爲永寧開皇十八年改焉有輔山 端氏註後魏置安平郡開皇初郡廢有

巨峻山秦川水

路史原伯爵后杼居原杜預云沁水西北有原城今河內軹履癸以原侯夸師者 紀年帝杼居原自原遷於老王

老王地闕

水經濟有二源東源出原城卽晉伐者今孟州濟源西北九里有古原城

張五典曰舊志謂周文王第十六子封原卽此地今考左傳

載晉文公伐原事註云原在沁水西北故舊志云爾按國語及淮南子諸書云周襄王以陽樊温原畿內四邑賜晉文公其後温與原叛文公伐之三日不降文公命班師曰吾與諸大夫期三日今三日不克吾寧失原不可失信於諸大夫原人聞之乃降温人聞之亦降則原與温固接壤也温卽今温縣樊陽皆在濟源俱屬河南懷慶府而原安得獨在此地乎蓋沁水南流入河亦經懷慶所云沁水西北者固指彼處而言也叔虞封唐在今翼城縣與沁水相去甚近故云屬唐

路史杜註及張氏說當互參之

原辨 趙衰守原在王屋山北温與陽樊在王屋山南然三日內聞風皆降不必壤相接也古史考趙衰居原在原平縣卽今代州崞縣按周穆王封造父於趙城晉獻公賜

趙夙耿夙生衰世爲晉卿原守去耿遠而去趙城甚近後襄子無卹北滅代而并智氏強於韓魏列爲諸侯武靈王拓地至燕代西併雲中九原崞縣之原平或襄子以後追祀其祖非文公故封也且霍太山以北文公時尚屬狄地未爲晉有至平公敗狄於太原晉陽乃爲趙氏邑則原城在沁水爲核

### 蒲州府

蒲州界辨 蒲郡本虞帝建都地春秋後屬魏秦及兩漢魏晉以後皆爲河東郡北魏分河東北鄉二郡屬雍州復屬秦州後周改蒲州兼置郡隋開皇初郡廢復置唐初爲蒲州開元九年置中都改河中府尋罷尋復又置河東採訪使治此宋仍爲郡置護國軍節度使屬陝西路金天會

間降爲州置防禦使天德元年升爲府大定五年置陝西元帥府元憲宗置河解萬戶府至元三年府罷仍爲河中府明屬平陽府今以河東西別山陝之界陝在河東尚有大慶關以西河灘地而界墻屹立仍截然不混統計所轄地前漢領二十四縣後漢領二十城晉領縣九唐領縣十三宋金領縣七元領縣六或治安邑或治河東或治蒲坂或治桑泉於中或分榮州或分虞州或別置慶成軍或兼置南北解變更不一轍矣

國朝繇平陽分直隸州州復升府且於臨晉分虞鄉復隋唐之舊制焉

二漢晉河東郡或屬司隸或屬司州今平陽澤州解絳隰地多屬焉魏分隸秦州隋唐以後猶兼有平陽解絳地如龍



門稷山襄陵安邑夏芮城河北等是也宋領縣與今同金元多河津一縣

元憲宗置河解萬戶府領河解二州河中府領錄事司及河東等七縣至元三年省虞鄉入臨晉省萬泉入猗氏併錄事司入河東罷萬戶府而河中府仍領解州八年割解州隸平陽路河中止領五縣十五年復置萬泉縣來屬領縣六

永濟縣

蒲坂地記蒲州河東縣二里故蒲坂城舜所都也城中有舜廟城外有舜宅舜井及二妃壇故老傳云卽釐降二女於媯汭之所

羅泌歷山辨 歷山今河東縣之雷首山也其山九名一曰

首陽臨河與太華對峙卽謂歷觀楊雄所云登歷觀以遙望者樂史謂在偃師西北二十五里有舜廟舜井媯水汭水媯南汭北然後魏輿地圖上谷記下洛城西南四十里有潘城城西北三里亦有歷山形如覆釜下有舜瞽二祠云是舜居帝之蹤跡何聞至是而齊之歷城南五里又有歷山水經注云上有舜祠縣東復有舜井亦云耕處寰宇記在縣東百步云舜之所穿又有華水與歷山井通曾子固言舜耕歷山漁雷澤陶河濱作什器於壽邱就時於負夏康成謂歷山在河東雷澤在濟陰而負夏則衛地皇甫謐乃謂壽邱在魯東門之北河濱爲卽陶邱乃定陶西南之陶邱亭耕稼陶漁皆舜之初年其地必不大相遠今皆在魯衛間則歷山不得獨在河東遂以爲娶後所居後世

因有媯水而遷就之夫河中乃帝所生若所都則歷城古歷下也其相去也遠矣耕漁之時徒以瞽聵不順暫卽荒野顧非日後就販之比其初未必遠去父母之側河濱雷澤其說未悉按九域志濟南濮陽河中皆有歷山俱存祠廟而今秦地池陽澧陽始寧河縣上虞無錫亦皆有之子列子云舜耕河陽書大傳云舜陶河濱按元和志乃河東縣北四十里之故陶城蘇氏演義云歷山有四一河中二齊之歷陽縣三冀州四漢之雷澤雷澤不聞有二耕漁必不相遠卽此爲是今曹濮間有舜豢龍井定陶城皆其蹤也然歷山何止是哉信都之歷山樂史亦以爲舜耕在是援神契云舜生姚墟應劭謂與雷澤相近寰宇記在雷澤縣東十三里歷山在縣西北十六里今濮之雷澤西北六

十里有小山孤立謂之歷山山北有小阜屬池目之姚墟邵謚緣之皆記舜耕之所而池之建德東十里更有堯城山縣南三十里有堯城堯祠云堯巡狩所至梁武於此立太原府縣北二十里爲舜城有舜井有歷山上有堯舜二祠元和郡志謂是兩帝南巡所至而周處記始寧界復有舜所耕田一山多柞因謂禭山而以具區爲之雷澤以其中有一大小雷山也王介甫從之妄矣夫使帝果南巡至是亦何預耕漁之日耶且以姚媯之名在在而是金之西城故有姚方媯墟杜佑謂舜生此而世本亦謂媯墟舜所生金在西城今長沙縣有媯水舜所都而上虞之損石號爲公嶽會稽有媯水三撫之泉經之東入海圖經亦以爲釐降之地祝阿故縣又有灤水俗呼娥姜水原有娥英之廟

水原山上有帝堯祠下開大穴謂之舜井堯之泗源又有陶墟亦有舜井其西阜號媯亭山山下一漏澤方十五里指爲帝之所漁不知此自姚墟謝息之所遷者又水經注上虞一曰虞濱太康地記爲避丹朱之所而雷澤亦非一周處謂是太湖故寰宇引尚書釋言謂在震澤若陽城漢濩澤縣墨子則言舜漁在此澤今在陽城西北十二里寰宇記爲烏鷄切矣郡國志言邑西今有地名舜田然今潭之益陽岳之沅江故梁之重華縣有虞帝城記亦謂是所都而述異記去湘水岸三十里有相思宮望帝臺志爲二妃之迹冷道臨武桂陽藍山等處悉有帝舜之祠藍山更有舜水舜鄉縣西十五里與永明西十五里皆有娥皇女英之廟江華太平鄉有舜女寺卽按歷城東南十里之廟

山晏氏三齊記在縣東南後人思舜而置廟也湘中記云地有舜之遺風人民純朴故老猶彈五絃之琴爲漁父辭莫不以爲虞帝之居豈盡信耶

永濟界辨 黃河之東古屬蒲州境繇臨晉夏吳夾馬口界達滎河河津以上達河曲此山陝界也顧唐河東縣與河西縣皆屬河東郡或廢或置凡數變焉開元八年析河東置河西縣乾元三年更同州之朝邑曰河西來屬大曆五年復朝邑河東別置蒲津關宋熙寧三年乃省河西入河東蒲城西舊爲黃河岸鐵牛今尚存更西數里有大慶關卽昔蒲津關臨晉關也明隆慶四年河徙而西移關於河東退灘漸涸爲田朝邑蒲州人互爭占

國朝雍正七年 特命大臣查丈立界牆以別山陝則河東

亦有陝地與唐宋兼轄河西者異矣

永樂屬永濟辨 繇永濟城西而南有雷首山卽中條轟起處馬融注首陽在蒲坂華山之北河曲之中是也過夷齊廟南東數十里有永樂鎮卽唐永樂縣後周置永樂郡尋復省隋開皇罷永樂郡以芮城屬河東郡唐永樂河東二縣同隸河東郡唐書注云武德三年置河東貞觀十年廢大曆十年復置有歷山有風陵關有芳醞監武德元年分芮城縣置永樂二年以永樂河北芮城置芮州九年州廢以永樂隸鼎州河北芮城屬陝州貞觀八年後永樂又隸號州神龍元年復屬河東宋熙寧六年乃省永樂爲鎮入焉金河東鎮二合河永樂合河卽匡河云

永濟虞鄉界辨

蒲州永濟在金爲河東縣金地理志注

有中條山五老山黃河媯汭而注虞鄉縣則云有雷首山中條山檀道山按黃河媯汭在蒲西境中條沿虞解以東迄而漸北其極西則轟起雷首河流於此一曲檀道山一名方山又曰鹽道山又曰百梯山而五老山又在方山之東去虞鄉城裁十里虞鄉界旣西及雷首河東界又東至五老豈兩邑互相管轄乎大凡山勢綿聯其左右前後正側皆得以故名概之嘗詢之士人謂繇方山五老山而上度危徑漸見平原地甚寬廣其南卽今永濟芮城二邑境也蒲州舊志云歷山在州南六十里媯汭泉出焉方山在州東南一百二十里永樂鎮後純陽宮卽在其麓外此所載山水尚夥而五老山不見州志今以地形揆之則雖謂虞鄉奄有方山五老山之陰永濟奄有方山五老山之陽

山西通志 卷一百一十八  
也可而今虞鄉西界裁止草平頭與雷首相距三十里是與金時界異也

臨晉縣

漢志顏師古註臨晉故大荔秦獲之更名有河水祠芮鄉故芮國莽曰監晉應劭曰臨晉水故曰臨晉臣瓚曰晉水在河之東此縣在河之西不得云臨晉水也舊說曰秦築高壘以臨晉國故曰臨晉師古曰瓚說是也說者或以爲魏文侯伐秦置臨晉非也文侯重城之耳豈始置乎

王恭先臨晉辨 舊志謂秦築高壘以臨晉國卽今之臨晉非也考班氏註左馮翊臨晉縣故大荔也秦取之更名應劭曰以臨晉水故名臣瓚曰晉水在河之東此縣在河之西不得云臨晉水也舊說秦築高壘以臨晉國故曰臨晉

章懷註曰臨晉故城在今同州朝邑縣西南斯言當矣史淮陰侯傳魏王豹盛兵蒲坂塞臨晉師古曰臨晉在河之西濱東臨晉境魏世家文侯十六年伐秦築臨晉正義曰在同州澄城縣界前曹參傳參以中尉從漢王出臨晉關伍被傳淮南王曰先要成臯之口塞轅轅伊闕之道守武關然此北尚有臨晉關地理通釋云卽蒲津關在臨晉縣由諸說觀之史記所謂塞臨晉者塞對河之臨晉關耳小司馬不諳地形乃曰臨晉縣名在河東岸對舊關不知漢時河東止有解縣而無臨晉此說一誤後人沿爲口實一統志於蒲州臨晉遂曰秦築高壘以臨晉國故名夫築壘臨晉本無所出獨見於臣瓚之注漢書旣引以實馮翊不知諸儒何見欲引入河東也卽曰河曲可入王官可俘而

山西通志 卷一百一十八  
高壘何不可築但河東西未聞一時有兩臨晉譌以傳譌  
建安馮智舒因之作質實編以註朱子綱目質而不實貽  
誤尤甚予固不得不爲之辨

宋白曰天寶之更今名必有所據則應劭臨晉水之說未可  
厚非按魏世家哀王十六年秦拔我蒲坂晉陽括地志云  
晉陽故城今名晉城在蒲州虞鄉縣西三十五里抑或  
臨晉陽而名之

臨晉辨 按臨晉之名始於唐天寶十三載臨晉水臨晉  
境二說昔人互持未決據顏師古註臨晉故大荔秦獲之  
更名又據章懷註大荔古戎國秦獲之改曰臨晉今同州  
城是也又據地理通釋臨晉關卽蒲津關在臨晉縣晉志  
註臨晉屬馮翊郡不屬河東合上三說所指皆非今臨晉

治也同州蒲津去今臨晉止百里然不可混

### 虞鄉縣

路史虞帝先世所封河東虞阪所謂嬪於虞者今解之虞鄉  
一曰吳在虞城北十三州志云平陸吳山上有虞城舜始  
封是穆王登薄山寘軫之墜宿於虞是也杜註在河東大  
陽樂史以爲安邑故武德爲虞州乃都也

路史解唐叔後今河中臨晉東南故解城在桑泉之南虞鄉  
東三十里城猶屬解僖十五年解梁以賂秦者非昭二十  
二年之解後魏爲二南解虞鄉北解臨晉

地形志河東郡南解註二漢晉曰解屬後改有桑泉城北解  
註太和十一年置有張楊城

北周世宗二年於河東置蒲州河北置虞州弘農置陝州正

平置絳州邵郡置邵州 隋改南解為虞鄉有石錐山百梯山百徑山今臨晉縣西南三十里五姓湖北有故城即其地也大業九年徙虞鄉縣於今解州治唐武德元年更虞鄉為解縣而於解西五十里別置虞鄉縣元後虞鄉鎮是也世祖至元三年省虞鄉入臨晉 虞田臨晉南六十里西魏置虞鄉縣隋隸蒲州唐因之元省入臨晉

唐河中府義寧元年治桑泉武德三年徙治河東舊通志夏封舜之子商均於虞即今臨晉縣之虞鄉舊縣志虞鄉以舜都名古解梁地

國朝雍正八年復分臨晉置虞鄉縣 雍正辛亥署刑部侍郎韓光基等奏臣到臨晉縣隨赴坡上縣川併虞鄉山下一帶地方相度形勢察訪輿論蓋因原任侍郎王璣條奏

分設虞鄉縣於坡上地方而撫臣石 以坡上去臨晉縣治僅十餘里請將虞邑設於涑水河南之虞鄉鎮臣等竊以虞南臨北中隔涑水一河實天成之界限請即以涑水一河為兩縣交界凡沿河村莊坐落河南者俱編入河南就近之里分以歸虞鄉坐落河北者俱編入河北就近之里分以歸臨晉統計臨晉一縣應分四十一里平陽衛四里所新設虞鄉一縣應分二十四里

臨虞今古分合辨 虞鄉在唐虞夏商皆屬畿內春秋屬解梁奄有桑泉等地戰國屬魏漢置解縣屬河東郡魏正始晉太康皆名解以司州領之後魏太和元年曰安定西魏大統十一年改分南解北解南解有桑泉城見魏書註又改綏化又曰虞鄉有石錐山百梯山百徑山見隋書註北解有張

楊城

見魏書註

尋廢隋開皇十六年置桑泉有三疑山

見隋北書註

面併今猗氏之半又別置虞州兼得今安邑地有鹽池銀

冶至大業初州廢

見隋書註

又改南解為虞鄉義寧元年虞鄉

屬安邑郡唐武德元年更虞鄉為解縣屬虞州而於解西

五十里別置虞鄉縣

即元廢縣後之虞鄉鎮也

三年析桑泉置溫泉縣

九年省入桑泉貞觀十七年廢虞州省解入虞鄉有鹽池

女鹽池紫泉監二十二年復以地入解天授二年復析解

縣置虞鄉北十五里有涑水渠渠即貞觀十七年刺史薛

萬徹開自聞喜引入下臨晉者也

見唐書註

五代至宋金惟周

世宗二年於河北復置虞州餘皆名虞鄉元世祖至元二

年乃省虞鄉入臨晉按虞鄉名始於西魏

見隋書註

屬虞州者

前後止數十年而漢後隋前皆屬河東唐罷郡為州屬蒲

州宋金元屬河中府明屬平陽府蒲州臨晉名始於天寶

十三載前此與虞鄉或分或合其北解故城在今臨晉東

南城東城西兩村之間非今解州治也

見郭為觀郟城考

惟南解

昔人所指各別考解州舊志南解管至虞鄉鎮即今虞鄉

縣是也臨晉舊志虞鄉在臨晉西南三十里五姓村北之

古城即古解梁地也郭為觀則謂在卿頭村即今涑水南

逕處也意卿頭五姓以及元虞鄉鎮皆古南解所轄乎抑

五姓湖即張楊池臨晉舊志引括地志云張楊城一名東

張城在蒲州虞鄉縣西北四十里則五姓湖倘亦北解所

轄乎春秋桑泉故城在今臨晉東北與魏桑泉城隋桑泉

城亦未可混為一隋桑泉即北解故城是也自省虞鄉入

臨晉幾五百年今以涑水姚渠中隔徵輸不便是以有復



設虞鄉之議其管轄以涑河爲界屬蒲州府自猗氏祁村智光以東臨晉五姓村以西沿河如東西渠下東西坑頭大小姚村楊村蒲落頭等村以南直達條山之陰皆隸虞鄉其餘河北各村皆隸臨晉天成界畫良規不易矣隋書註開皇十六年置虞州大業初州廢唐書註義寧元年以安邑虞鄉夏置安邑郡武德元年曰虞州又析置桐鄉縣三年析安邑置興樂縣貞觀元年省十七年州廢按虞州治在安邑蓋兼夏與虞鄉而轄之言虞鄉卽解在其

中矣  
虞鄉有百梯山石錐山百徑山見於隋書今考百梯山卽方山在虞鄉西南平陸有錐子山一名石錐壁卽石錐山解州東有百徑嶺卽百徑山亦與平陸接界然則隋書所

載之虞鄉其東南疆域殆甚廣歟

魏地形志河東郡北解縣有張楊城水經注云張楊城卽漢書曹參傳之所謂東張矣蘇林曰屬河東卽斯城也括地志云張楊城一名東張城在蒲州虞鄉縣西北四十里今按地形五姓村北之古城距張楊池止四五里距虞鄉治止二十餘里括地志所指虞鄉西北四十里疑指卿頭故城以及城東城西兩村之故城非今虞鄉縣治也平陽衛所屯營有五舊隸臨晉

國朝雍正三年裁衛五年始隸於縣田賦丁徭與民畫一八年分設虞縣以涑河爲界右所在涑河南故隸虞鄉其左所中所前後所仍屬臨晉晉府羣牧十三營本散列東西今以夏吳浪店夾馬口下馬營在西北隅與臨晉近故屬

山西通志 卷一百一十一 虞鄉從民便也

臨晉其餘九營在涑河南故撥入虞鄉從民便也  
虞鄉虞城辨 虞都蒲坂即蒲州永濟也虞鄉相距六十  
里在甸服內臨晉舊志謂虞鄉以舜都故名他無所考問  
武王克商求太伯仲雍後得周章已為吳君別封其弟虞  
仲於故夏墟在河東大陽縣今夏縣有大陽故關即平陸  
縣東北六十里古虞城亦謂之西吳一作西虞傳十二世為虞  
公即出奔共池者也後晉假道伐虢上陽遂被襲遷其民  
於今孝義縣之虞城舜後與周後不可合為一也有謂虞  
封上公公侯方百里安知虞鄉不屬虞仲乎按今虞芮所  
讓閒田尚存繇王官谷越橫嶺至芮城凡五十餘里繇解  
州城東循鹽池王家井而南越山至平陸縣凡百里古虞  
城又在今縣東北六十里去虞鄉甚遠濶越嶺而轄似為

未便若虞鄉達蒲坂地差平坦則以虞鄉為舜後封似為  
近之抑史記帝舜為有虞皇甫謐註舜嬪於虞因以為氏  
今河東大陽西山上虞城是杜預註虞思虞舜後諸侯也  
思有虞君也路史虞帝先世所封河東虞坂所謂嬪於虞  
者今解之虞鄉前編舜之先國於虞為虞氏系出虞幕十  
三州志云平陸吳山上有虞城舜始封是穆天子登薄山  
寘軫之陞宿於虞是也又路史平陸東北六十里吳山上  
有故虞城虞井本帝舜之後國所謂西虞合此數說意舜  
後封域殊廣且袤及平陸境內乎史載舜子商均封國夏  
后之時或失或續不可詳考今歸德府虞城縣昔傳禹封  
商均於此在漢亦名虞縣而今滎河又稱古綸地左傳載  
夏少康逃奔有虞虞思妻之二姚而邑諸綸舊註綸即虞

邑博物志以汾陰為古綸汲冢古文括地志竹書紀年皆謂在鞏洛間此可闕疑路史又以解為唐叔後謂叔虞子良食采於解邑遂以邑為氏云

猗氏縣

前後漢猗氏胥屬河東郡註地道記曰左傳文十三年詹嘉

處瑕在縣東北

日知錄中嘗辨之

晉屬河東郡註古猗頓城 魏

屬河東郡註有介山塘 又北猗氏屬北鄉郡註太和十

一年置有解城 隋屬河東郡註西魏改曰桑泉後周復

焉

附錄

前漢猗氏屬上黨郡

後漢猗氏屬上黨郡註漢書音義縣

出鵠

職方氏冀州畜宜牛羊上黨舊有猗氏縣

岳陽有猗氏關

地當在長

子屯留西北間

漢鮑宣徙長子曰宜畜牧唐藩鎮澤潞傳大將李萬江有津

梁種馬元李植以谷量牛馬富甲諸州明弘正時壺關猶

有張萬羊之稱

屯留漢晉魏胥屬上黨郡 地形志上黨郡屯留註二漢晉

屬有屯留城鳳凰山一名天冢山大王山上有關龍逢祠

有疑山邁澤黃河嶺絳水自寄氏界來入濁漳因名交漳

余吾城陽水源出三槐山東流合車臺水東南入絳水

寄氏註二漢為猗氏屬北魏景明元年復改有猗氏城三想

山北有水源出蒲谷東南流入絳水有八禮泉上黨谷有

盤秀嶺藍水出其南東入濁漳有方山伏牛山 樂陽註

普泰中分長子寄氏置有望天嶺絳水所出有堯廟

岳陽漢屬上黨郡魏屬義寧郡隋屬臨汾郡唐屬晉州宋金

屬平陽郡元屬晉寧路 元志岳陽註下本猗氏縣屬平

陽府至元三年省入岳陽縣四年以縣當東西驛路之要

復置併岳陽和川二縣入焉後改爲岳陽縣

猗氏辨 猗氏古屬河東郡以猗頓所居名迄元明不改

獨西魏改曰桑泉後周復焉隸汾陰郡桑泉卽今臨晉北

坡臨晉在隋開皇亦曰桑泉有三疑山金置臨晉亦有三

疑山後魏屬河東郡者曰猗氏註云有介山塘屬北鄉郡

者曰北猗氏註云有解城古解在臨晉三疑屬猗氏西北

隅二邑分合無常自昔然矣然胥屬蒲州府境惟屯留岳

陽舊亦名猗氏屯留有余吾之地及寄氏之半魏書註云

寄氏二漢爲猗氏屬北魏景明元年復改有猗氏城岳陽在

元屬晉寧路註云本猗氏縣屬平陽府至元三年省入岳

陽岳陽別有猗氏關按屯留岳陽接壤在沁水浮山北去

蒲屬之猗氏且五百里考前後漢猗氏隸河東郡而上黨

郡又有猗氏猗氏史筆精嚴必無冗複又孔叢子曰猗頓

之問術於陶朱公也曰欲速富當畜五牝乃適上黨之西

河大畜牛羊於猗氏之南十年後貲息不可勝計名馳天

下然則北繇平潞南逮蒲阪將胥猗頓畜牧蕃息地邪

郇瑕

路史荀侯爵珣郇也今猗氏西南古郇城是杜佑云猗氏古

珣國竹書紀年次於郇者或云邠之三水桐邑非也晉伐

荀以賜原氏則河東矣汾水所經荀城也 又曰荀逝敖

采本鄭地重耳軍盧柳濕次於郇者

按晉語狐偃盟於郇韋云鄭地非河東郇是韋昭失之於前而羅泌失之於後也

漢志右扶風枸邑有幽鄉詩幽國公劉所都應邵曰左傳畢原酆郇文之昭也郇侯賈伯伐晉是也臣瓚曰汲郡古文晉武公滅郇以賜大夫原氏黯是爲荀叔又云文公城荀然則荀當在晉之境內不得在扶風界也今河東有荀城古荀國師古曰枸讀與荀同

文王第十七子封郇國郇音荀一音環今有環音之氏而未聞荀者氏族博考云按譜文王第十七子然原郇二侯不在其例此譜系之家失於紀載原郇爲文王之昭左氏甚明第十七子一本作第十五子

元和志猗氏西南四里絳之正平西十五里

郇伯故城縣南十八里周文王第十五子封此南三里有涑

水故道

郇城縣南二十里隋大業九年廢

北平故壘卽北城址也唐馬燧討李懷光築此

路史縣南二十里有猗氏故城魯人因陶朱興富於猗氏因曰猗頓

路史杜預云郇瑕古國伏氏云在解東郇瑕氏之墟也地薄水淺近於鹽謂鹽澤也然郇與瑕二郇音環

路史苦苦成也王符云郇犇采於苦曰苦城故城在鹽池東北後或爲枯齊人改曰車成一作古城

舊志晉公子重耳濟河圍令狐入桑泉令狐在今縣西十里

山西通志 卷一百一十八  
桑泉之析置則自隋開皇十六年始也春秋杜氏注郇瑕之地沃饒而近鹽在解縣西北鹽今猗氏縣鹽池也魏都賦注鹽池在猗氏縣南四十六里柳子厚曰猗氏之鹽晉寶之大也唐書地理志注猗氏爲次畿地有孤山元王思誠詩條山河水壯封疆城外崱原百里長蒲坂東通猗頓宅桑泉南下接虞鄉亦統諸邑而論之

郭爲觀郇伯故城考 邑城南十八里有郇伯故城俗乃稱爲猗氏故城而指臨晉之亭東村小蓋堡爲郇伯城誤矣按水經注涑水又西逕猗氏縣故城北又西逕郇城杜元凱春秋釋地云今解縣西北有郇城服虔曰郇國在解縣東郇瑕氏之墟也按竹書紀年云晉惠公十五年秦穆公送公子重耳圍令狐桑泉曰衰皆降秦師狐毛先軫禦秦

至於廬柳穆公使公子繫來與師言退舍次於郇春秋之文與竹書不殊今解故城東北二十四里有故城在猗氏故城西北鄉俗名爲郇城考服虔之說又與俗符賢於杜氏單文孤證矣據此則解縣西北之說注已先駁之矣考解故城有二皆非今治今治乃唐改隋虞鄉縣故治爲之而別於其西五十里置虞鄉縣其故城一在臨晉之城東城西兩村之間乃北解也一在卿頭村乃南解也其故跡皆存北解置於元魏間不久而廢桑欽漢時人則水經所謂又西過解縣南并注所謂西南逕解縣故城南者皆指南解言也其故址正在郇城西南二十餘里况涑水故道現在郇城南三里許非注中西逕郇城之明證乎注又云郇在猗氏故城西北今猗氏故址雖不可考然以地勢度

之必在今解安二境之界按注謂鹽田本司鹽都尉治故  
 杜預曰猗氏有鹽池後罷尉司分猗氏安邑置縣以守之  
 則其城必近鹽田可知也况注明謂涑水逕猗氏故城北  
 今郇城迤東數十里涑水故道宛在也非逕其北而何哉  
 如以郇為猗則古城之脉東北自名條岡來坡坨連亘界  
 無隱伏之處涑水安得越而西逕乎至於亭東村小蓋堡  
 居峩崱之原地勢高亢南距涑水故道不啻五十里又安  
 得謂之逕乎又春秋傳云郇瑕地沃饒近鹽今亭東去鹽  
 池七十里豈得言近峩崱磽瘠之地又豈得言沃饒乎且  
 卽亭東之名義釋之亦斷非故郇也蓋秦漢建置大者曰  
 縣曰邑小者曰鄉曰亭有尉有長如泗上亭長灞陵亭尉  
 是也然則亭東必是古亭遺址亦猶北解故城之左右以

城東城西名村也豈得妄指為郇都乎况古城遺址周廻  
 十餘里四方八門規模宏濶其為國都之制而非縣邑之  
 制也夫復何疑隋地理志河東郡虞鄉後魏曰安定西魏改曰南解又改曰緱化又曰虞鄉此郭氏  
郇伯故城考之案據也

猗氏城郇城解城桑泉令狐白城等地通辨 今猗氏城  
 非郇伯故城也故城在今縣治南十八里猗故址不可考  
 然酈註瑕城在故解城東北二十四里猗氏故城西北俗  
 名郇城郭為觀據此以辨且謂北解在今臨晉城東城西  
 兩村之間南解在卿頭村去郇城西南二十餘里按郇城  
 在猗縣南二十里隋大業九年廢與郇伯故城似屬兩地  
 左傳郇瑕每分舉而諸大夫皆曰必居郇瑕氏之地則連  
 及之揆其里道疑亦不相遠也猗氏故城應在郇城東南

郭爲觀謂應在解安之交乃今解非古解也但杜釋地云今解西北有郇城又曰猗氏縣東北有瑕城服虔曰郇國在解縣東解東解西二說不符意晉時解之東境所轄甚廣西北二字第據一境而言耳晉志註解謂有鹽池今池東西共一百二十里地形可據至服虔所云在解縣東則無論南北解皆屬東境此無可疑者卿頭去城東城西兩村約二十五里城東城西在今涑河北卿頭在涑河南古令狐在今猗氏之西北隅春秋桑泉故城在今臨晉東北隅後漢解有桑泉城杜註在縣西二十里後魏南解有桑泉城疑皆在臨晉而西魏改猗氏曰桑泉隋桑泉有三疑山則又兼界今之臨猗二邑矣曰城後漢亦屬解晉文公取臼衰卽此據杜預註在縣東南是謂在解縣東南也應

屬今虞鄉

萬泉縣

唐書河中府萬泉註本隸秦州武德三年析稷山安邑猗氏汾陰龍門置州廢隸絳州大順二年來屬有介山

顧炎武縣上辨 左傳僖二十四年晉侯賞從亡者介之推不言祿祿亦弗及遂隱而死晉侯求之不獲以縣上爲之田杜氏曰西河介休縣南有地名縣上水經注石桐水卽縣水出介休縣之縣山北流逕石桐寺西卽介子推之祠也袁崧郡國志曰界休縣有介山有縣上聚子推廟今其山南跨靈石東跨沁源世以爲之推所隱而漢魏以來傳有焚山之事太原上黨西河雁門之民至寒食不敢舉火石勒禁之而雹起西河介山大如雞子平地三尺前史載



之無異辭也然考之於傳襄公十三年晉悼公蒐於縣上以治兵使士句將中軍讓於荀偃此必在近國都之地又定公六年趙簡子逆宋樂祁飲之酒於縣上自宋如晉其路豈出於西河界休乎况文公之時霍山以北大抵皆狄地與晉都遠不相及今翼城縣西亦有縣山俗謂之小縣山近曲沃當必是簡子逆樂祁之地襄公二十九年齊高豎致盧而出奔晉晉人城縣而寘旃今萬泉縣南二里有介山漢書武帝紀詔縣或即縣山曰朕用事介山祭后土皆有光應地理志汾陰介山在南今萬泉古汾陰地楊雄傳其三月將祭后土上廼帥羣臣橫大河湊汾陰既祭行遊介山回安邑顧龍門覽鹽池登歷觀陟西岳以望八荒雄作河東賦曰靈輿安步周流容與以覽於介山嗟文公而愍推兮勤大禹於龍門水經注亦引此

謂晉太康記及地道記與永初記竝言子推隱於是山而辨之以為非然可見漢時已有二說矣

滎河縣

滎河古綸地夏少康邑 左傳昔有過澆殺斟灌以伐斟鄩滅夏后相后緡方娠逃出自竇歸於有仍生少康焉為仍牧正其澆能戒之澆使椒求之逃奔有虞為之庖正以除其害虞思於是妻之以二姚而邑諸綸有田一成有眾一旅能布其德而兆其謀以收夏眾撫其官職使女艾諜澆使季杼誘豷遂滅過戈復禹之績祀夏配天不失舊物正義括地志云故鋤城在滑州衛城縣十里晉地記云河南有窮谷蓋本有窮氏所遷也括地志云商邱今宋城也斟灌故城在青州壽光縣東五十四里斟鄩故城今青州

北海縣是也故過鄉亭在萊州掖縣西北二十里本過國地故鬲城在洛州密縣界杜預云國名今平原鬲縣也戈在宋鄭之間也寒國在北海平壽縣東寒亭也伯明其君也臣瓚云斟鄩在河南蓋後遷北海也汲冢古文云太康居斟鄩羿亦居之夏季又居之尚書云太康失邦兄弟五人須於洛汭此即太康居之為近洛也又吳起對魏武侯曰夏季之居左河濟右太華伊闕在其南羊腸在其北又周書度邑篇云武王問太公吾將因有夏之居即河南是也括地志云故鄒城在洛州鞏縣西南五十八里蓋夏季所居也陽翟縣又是禹所封為夏伯

日知錄夏之都本在安邑太康改於洛表而羿距於河則冀方之地入於羿矣惟河之東與南為夏所有至後失國依

於二斟於是使澆用師殺斟灌在今壽光縣以伐斟鄩在今濰縣而

相遂滅左傳哀元年乃處澆於過今掖縣以致東方處豷於戈杜

解在宋鄭之間以控南國襄四年其時靡奔有鬲今在德平縣在河之東

少康奔有虞今虞城縣在河之南而自河以內無不安於亂賊

者矣合魏絳伍員二人之言可以觀當日之形勢而少康

之所以布德兆謀者亦難乎其為力矣竹書謂太康元年即居斟鄩非也

博物志以汾陰為古綸今汾陰北九里汾陰城宋州虞城西二十五里綸

城乃正說也後漢書黃瓊至綸氏稱疾不進章懷注綸氏即夏

之綸國少康之邑也竹書紀年云楚及秦伐鄭綸氏今洛

州故嵩陽縣城是也李膺還居綸氏教授常千人注綸氏縣屬潁川郡

故城今陽城縣也

綸辨 前漢汾陰屬河東郡註介山在南後漢汾陰有介

山西通志 卷一百七十八  
山註引博物記曰古之綸少康邑縣西北有狐谷亭郭璞爾雅註曰縣有水口如車輪許漬沸涌出其深無限名之爲瀆此滎河所據以名古綸者也顧前漢潁川郡別有綸氏後漢志梁國所隸之虞有空桐地有桐地有桐亭有綸城少康邑按瀆水見爾雅水經注皆在汾陰縣如臨晉有瀆泉同州郃陽亦有瀆皆可考惟少康邑不見於汾陰本文而特紀於梁國今以博物記錄之

汾陰城縣北九里周顯王十四年秦伐魏取汾陰土人名殷湯城

漢志注汾陰介山在南

地形志秦州北鄉郡領縣二 北猗氏 汾陰注二漢晉屬河東後屬有北鄉城后土祠

隋汾陰註舊置汾陰郡開皇初郡廢有龍門山

唐寶鼎註義寧元年以汾陰龍門置汾陰郡武德元年曰秦州州廢來屬開元十年獲寶鼎更名有后土祠

宋大中祥符中以滎河爲慶成軍熙寧元年廢以滎河隸府而縣治置軍使

金貞祐三年升滎州以河津萬泉隸焉有黃河汾水睢邱元初廢州復縣

遼州

地形志樂平郡遼陽註晉屬太平真君九年併鄉孝昌二年復有黃澤嶺遼陽城

隋志樂平註舊置樂平郡開皇初廢郡十六年分置遼州及東山縣大業初廢州及東山縣有臯落山有清漳水 和

順註舊曰梁榆開皇十年改有九京山 遼山註後魏曰  
遼陽後齊省開皇十年置改名焉十六年屬遼州并置交  
漳縣大業初廢州并罷交漳入焉有其轅水 平城註開  
皇十六年置有徐水石艾註有蒙山 以上同屬太原郡  
唐志遼州樂平郡下武德三年析并州之樂平遼山平城石  
艾置六年徙治遼山八年曰箕州先天元年避元宗名曰  
儀州中和三年復曰遼州領縣四 遼山 榆社 平城  
和順  
宋熙寧七年州廢省平城和順二縣爲鎮入遼山縣隸平定  
軍省榆社縣爲鎮入威勝軍武鄉縣元豐八年復置州縣  
鎮並復來隸元祐元年復置遼山和順平城榆社縣屬樂  
平郡

金遼州中刺史天會六年以與東京遼州同加南字天德三  
年復去南字

元隸晉寧路

明一統志隋置平城縣隸并州金廢爲鎮後復置改曰儀城  
遼陽城本涅氏縣後魏改遼陽北齊省隋置遼山縣於此  
城唐廢 遼陽城在縣北唐武德三年以枯河漲潦徙今  
治

遼州界辨 遼州在秦漢爲上黨地後魏曰遼陽隋曰遼  
山唐曰遼州曰箕州曰儀州曰樂平宋曰平定元屬平陽  
路明爲遼州東界河南彰德府武安縣西界太原府太谷  
縣南界沁州武鄉縣北界平定州樂平縣按州南北太行  
山綿亘八九百里而州治在太行絕頂云

和順縣

舊唐志和順漢沾縣地隋為和順縣武德初屬并州三年改屬遼州 是年析置義興縣六年省縣治東北有和順古城與今縣城相倚

榆社縣

隋開皇初改涅縣為榆社今西北三十里社城鎮漢涅縣址也

唐志榆社本隸太原郡義寧元年析上黨之鄉置武德元年隸韓州三年以縣及并州之平城置榆州又析置偃武縣六年州廢省偃武以榆社平城來屬 地理新書石晉韓王王建立以地多桑榆仍名縣曰榆社

路史榆州孤而無使曲沃伐之而亡見博物志當亦儀之榆周書文今不見

社或云魏榆

晉之離榆亦曰魏榆杜預云朝歌東有離榆城今衛縣隋改

故縣在治東六十里高嶺盤隔有城址或曰遼山縣或曰古箕城

古城址在治東北與今縣城相倚周四百八十丈

按榆社與武鄉在漢同為涅縣故地而在晉同名武鄉隋於武鄉析置榆社在宋同屬威勝軍即今沁州是宋以前遼沁殆合為一也

沁州

後漢志涅有闕與聚

今俗名烏蘇村

地形志鄉郡銅鞮註二漢晉屬上黨有銅鞮城有烏蘇城沙石堆有堯祠 襄垣郡五原註建義元年分上黨郡之屯留置

隋志銅鞮註有舊涅縣後周改爲陽城開皇十八年改爲甲

水大業初省入有銅鞮水甲水城在今治北

唐沁州本義寧郡義寧元年置天寶元年更名陽城郡領沁

源和川綿上三縣

宋太平興國三年於潞州銅鞮縣亂柳石園中建威勝軍

金志沁州中錦山郡宋威勝軍天會六年升爲州元光二年

升爲節鎮軍曰義勝領銅鞮武鄉沁源綿上四縣

元領銅鞮沁源武鄉三縣

銅鞮城在州南四十里晉大夫羊舌赤邑漢縣隸上黨郡金

徙沁州治此明省入沁州今名故縣村

斷梁城在州東北廣袤二里三面絕澗上黨記銅鞮晉別

宮墟關猶存北城去晉宮二十里羊舌所邑左傳成九年

晉執鄭伯於此

沁州界辨沁州爲晉銅鞮大夫羊舌赤邑銅鞮山在州

城南又傳有舊宮遺址秦漢屬上黨郡沁源卽穀遠沁水

自出魏置義寧郡郡治在縣隋廢復置後又升爲郡又析

置和川縣唐稱陽城郡屬韓州改屬潞州又稱沁州武鄉

卽涅氏石勒分上黨置武鄉郡魏罷復置領陽城襄垣鄉

銅鞮四縣隋析榆社兼南垣州又改豐州唐屬韓州及潞

州自涅城徙治於南亭川卽今治也兩縣在宋均屬威勝

軍一名銅川神武軍是沁州所轄本與潞澤遼通自明分

建州治領二縣沁源在州西界平遙介休岳陽靈石武鄉

在州東北繇河南彰德府涉縣過潞安府達太原府祁縣

尤爲南北要路隋唐間州治在沁故至今州以沁名其發

源不在州治也

沁源縣

隋書沁源註後魏置縣及義寧郡開皇初廢十六年置沁州  
義寧縣十八年改爲和川大業初州廢又廢和川縣入焉  
唐書武德二年析置招遠縣三年省 義寧元年析沁源置  
和川

宋太平興國六年廢沁州以沁源縣隸威勝軍

金元光二年升穀州

元至元十年省綿上入沁源

武鄉縣

漢志注涅氏涅水也師古曰涅水出焉故以名縣章懷注涅  
縣名屬上黨郡故城在今潞州鄉縣西

地形志鄉郡註石勒分上黨置武鄉郡後罷延和二年置領

縣四 陽城注二漢晉上黨曰涅永安中改有涅城 襄

垣 鄉注郡治晉屬上黨真君九年罷遼陽屬焉有武鄉

城魏城榆社城 銅鞮

隋書鄉注開皇初廢舊郡十六年分置榆社縣大業初廢又  
有後魏南垣州尋改豐州後周廢

舊唐志武鄉漢垣縣後魏曰沮城移治於南亭川改爲鄉縣  
屬韓州州廢屬潞州則天加武字神龍元年去武字復爲  
鄉縣後又加武字 屬潞州上黨郡

宋武鄉注熙寧七年廢遼州以榆社縣爲鎮入焉元豐八年  
復置遼州以榆社往隸

金志有胡甲水武鄉水

山西通志 卷二百七十八  
元至元三年省入銅鞮後復立

平定州

趙武靈王二十一年攻中山趙祗爲右軍許鈞爲左軍公子章爲中軍王并將之牛剪將軍騎趙希並將胡代趙與之  
涇合軍曲陽攻取丹邱華陽鴟上塞王軍取鄆石邑封龍東垣中山獻四邑和王許之罷兵

徐廣曰涇者山絕之名常山有井涇中山有苦涇上黨有闕與正義涇涇山也在并州涇縣東南十八里趙希并將代趙之兵與諸軍向井涇之側共出定州上曲陽縣攻取丹邱華陽鴟上之關括地志上曲陽故城在定州曲陽縣西五里丹邱邢州縣括地志北岳五別名三曰華陽臺徐廣曰鴟一作鴻鴻上故關在定州唐縣東北六十

里鄆在常山括地志石邑故城在恒州鹿泉縣南三

十五里封龍山在鹿泉縣南四十五里

漢志注綿曼水東至蒲吾入虜池水

地形志樂平郡石艾註前漢屬太原後罷晉屬真君九年罷孝昌六年復故名上艾後改有井涇關葦澤關董卓城妬女泉及祠

路史艾侯爵穆鼎有艾侯作艾王俅以爲共誤并之廣陽漢之上艾後漢石艾也又吳有艾縣隋入建寧有艾陵今在武寧

廣陽城州東南三十里古上艾縣後改石艾唐天寶初改廣陽縣至宋徙榆關而廢古廣陽城在州西南今名廣陽村



唐武德八年賽魚城爲受州治貞觀八年州廢 唐建承天  
軍爲太原恒山之界後唐莊宗會趙王鎔於此宋太平興  
國時廢今名承天都娘子關在焉

太平興國四年以廣陽地當衝要又先克復乃升爲平定軍  
金平定州有刺史本宋平定軍大定二年升爲州興定二年  
爲防禦十一月復降爲刺郡領平定樂平二縣元至元二  
年省倚郭平定樂平二縣入本州七年復立樂平領一縣  
明井陘兵備道駐獲鹿隸山西職官

按二漢俱有平定縣屬西河郡莽曰陰平亭非此平定  
也此平定宋始更名

平定界辨 太原東二百八十里爲平定州衆山環繞當  
井陘要衝爲直隸正定之門戶漢以後或隸太原郡或隸

常山國或隸樂平郡或隸遼州或隸受州或隸鎮州宋爲  
平定軍而金升爲州元明因之

國朝分太原之壽陽孟二縣與樂平同隸州治而新舊固關  
間又增置甘桃驛焉

### 壽陽縣

壽陽辨 壽陽在太原榆次之東魏地形志中都註有榆  
次城壽陽城受陽註晉屬樂平真君九年罷樂平屬有大  
陵城文谷水隋書壽陽註開皇十年改州南受陽縣爲文  
水分州東故壽陽置壽陽有鸞巖唐書孟註武德三年以  
孟受陽置受州壽陽註本受陽武德六年徙受州來治又  
以遼州之石艾樂平隸之貞觀八年州廢縣皆來屬十一  
年更名有方山按今之文水卽魏之壽陽隋之壽陽非卽

受陽也其州東故壽陽疑卽魏中都之壽陽城以地形別之當以在榆次者爲西壽陽以隸平定州者爲東壽陽云金興定二年九月割隸平定州四年以壽陽縣西張寨置晉州按此晉州與平陽之晉州有辨

孟縣

路史仇吾一曰仇繇韓子云仇繇小國爲智伯所滅後有仇

吾氏

呂春秋中山國有夙繇之君智伯伐亡之卽仇繇之誤

一作凸猶非國策云智

伯欲伐之遺以大鐘

韓子智伯以大鐘遺仇繇又云遺以廣車

按河東孟縣有

原仇城或云卽孟之外城仇繇城俗名原仇九域志亦在

九原并

又云凸猶班志屬臨淮今泗之漣水或以爲卽仇繇非智伯所伐不在是

按今縣北六里有仇猶山東有仇猶城又傳仇猶妃殉

於腥河

漢志孟注晉大夫孟丙邑後漢志注作孟邴邑

路史孟孟丙孟大夫邴氏漢縣隸太原唐邢今陽曲東北八

十里故孟城定八年劉子伐孟

續志云國

非衛東孟也

定十四年蒯賾

獻齊者也又哀四年孟周地

若宋孟

僖二十一年公作霍穀作雩一作字

隋開皇十六年置原仇大業初改孟縣有白鹿山

唐隸太原府武德三年以孟受陽置受州貞觀元年省并州

之烏河縣入焉

金興定中升爲州聽絳州元帥府節制置刺史尋復有白馬

山泉仇山滹沱水

元亦名州

張淑譽孟邑辨 仇猶國名見戰國策作凸由卽今之孟縣

是也縣治東北里許仇猶故城基尚在趙之所謂原仇城

卽此按左傳頃公十二年韓宣子卒魏獻子爲政分祁氏之田爲七分羊舌氏之田爲三孟丙爲孟邑大夫此魯昭公二十八年事也疑此時晉國別有孟邑非今之孟但未知邑治在何處舊志以今之孟爲孟丙之食邑因誤以孟丙卽仇猶亡國之主似誤又按史記通鑑綱目等書皆載荀瑤滅夙繇注曰翟國也戰國策作召由目曰初智伯欲滅夙繇而無道乃鑄大鐘方車二軌以遺之夙繇之君斬岸堙谷以迎鐘赤艸蔓枝諫曰智伯貪而無信欲伐我而無道今師必隨之不聽赤草蔓枝曰爲人臣不忠貞罪也忠貞不用遠身可也遂斷轂而行至齊而夙繇亡所載甚明舊志以孟丙爲仇猶之君以赤艸蔓枝爲孟丙家臣亦誤按舊志趙滅仇猶置原仇城此今之孟縣無疑又云秦

屬太原漢於原仇西百里置孟縣注云疑卽撫城縣或曰

卽大孟縣未知孰是愚按此乃孟丙食邑之孟與仇猶無

與又按舊志云春秋時在太原府東北八十里置大孟城

注云卽今黃鼠村然訪之乃在黃鼠之北三十里此乃戰

國之孟孟丙所分或在是乎總於今之孟無與

與漢書註稍異

日知錄曰春秋地名孟者有五僖公二十一年宋公楚子陳

侯蔡侯鄭伯許男曹伯會於孟宋之孟也定公八年單子

伐簡城劉子伐孟以定王室周之孟也十四年衛太子蒯

躋獻孟於齊衛之孟也而晉則有二孟昭公二十八年孟

丙爲孟大夫今太原孟縣哀公四年齊國夏伐晉取邢任

欒郟逆時陰人孟壺口此孟當在邢洛之間

樂平縣

昭公二十二年晉荀吳使師偽糴者負甲以息於昔陽之門  
遂襲鼓滅之杜註樂平沾縣東有昔陽城

寰宇記荀吳假道於鮮虞遂入昔陽鮮虞在北昔陽在南晉  
恐肥爲備故從北僞東南行往會齊師乃先還假道鮮虞  
遂入昔陽也

劉炫曰肥鼓並在鉅鹿 有昔氏鉅鹿昔陽城

按水經注一卷中昔陽城兩見一在下曲陽一在沾縣  
疑有二昔陽城蓋肥都沾縣鼓都下曲陽也

路史昔陽本肥

肥子後遷昔陽

今平定之樂平東五十里有昔陽故

城昭十二年晉滅之故鉅鹿境一曰夕陽開皇置昔陽於  
下曲陽今祁之鼓城

九域志趙鞅晉陽

列子襄子攻狄取左人中人應邵地理記中人城西北四十  
里有左人城左人之故邑 左人卽今定之唐縣

地形志樂平郡樂平注晉屬真君九年併治孝昌二年復有

象山祠沾嶺八賦嶺 樂平郡後漢獻帝置真君九年治

太原孝昌二年復治沾城領縣三 遼陽 樂平 石艾

漢沾縣隸上黨郡隋置遼州於此今治西南有城址

隋志樂平注舊置樂平郡開皇初郡廢十六年分置遼州及  
東山縣大業初廢州及東山縣有臯洛山有清漳水

金興定四年從遼州刺史行元帥府事郭文振請升樂平縣

爲臯州

臯落城在東南七十里卽春秋臯落氏所居漢置縣今爲臯

落村

山西通志 卷一百一十一  
正定志鼓聚在晉州西漢書晉荀吳滅鼓昔陽亭卽此  
日知錄漢書地理志鉅鹿下曲陽應劭曰晉荀吳滅鼓今鼓  
聚昔陽亭是也水經注泚水東逕肥纍縣之故城南又東  
逕昔陽城南本鼓聚十三州志曰今其城昔陽亭是矣京  
相璠曰白狄之別也下曲陽有鼓聚其說皆同史記趙世  
家惠文王十六年廉頗將攻齊昔陽取之夫昔陽在鉅鹿  
故屬之齊豈得越太行而有樂平乎

### 忻州

漢建安二年正月省雲中定襄五原朔方郡郡置一縣領其  
民合爲新興郡今故城址尚存 二十一年議者以南單  
于部久居塞內與編戶同而不輸貢賦浸難禁治單于入  
朝魏王曹操遂留之鄴下使右賢王歸統其國分其衆爲

### 五部居北部於新興郡

地形志肆州注治九原天賜二年爲鎮真君七年置州領郡

三 永安 秀容 雁門秀容郡注永興二年置真君七  
年併肆盧敷城二郡屬焉領縣四

秀容注永興二年置有秀容城原平城肆盧城石鼓山神女

郎神金山神護君神風神 石城注永興二年置有大頹

石神 肆盧注治新會城真君七年併三會屬焉有清天

神大羅山臺城大邗城 敷城注始光初置郡真君七年

改治敷城有石谷山亞角神車輪泉神

舊通志肆州故城亦名秀容在西北五十里後魏肆州治此

後周徙州治雁門縣通考卽積粟所在 肆盧川亦在此  
一名肆樓川

尔朱氏世居北秀容道武初又令遷居南秀容羽健未遷仍

後此北魏永興置秀容郡後併肆盧敷城共領縣四隋屬樓煩郡唐屬忻州定襄郡

按南秀容卽今忻州北界北秀容三百里乃神池五寨尙嵐縣永寧州等境也

水經注魏土地記秀容胡徙居此立秀容護軍東去汾水六十里

唐忻州定襄郡本新興郡義寧元年以樓煩郡之秀容置舊唐志秀容漢汾陽縣地治郭下隋自秀容故城移於此因改爲秀容縣

宋志定襄郡團練屬忻州

定襄縣

漢建安中曹操驅塞下流民以實新興郡始治定襄縣

地形志肆州永安郡注後漢建安中置新興郡永安中改領

縣五定襄注前漢屬定襄後漢屬雲中晉屬新興真君七

年併雲中九原晉昌屬焉永安中屬有趙武靈王祠介君

神五石神聖人祠皇天神定襄城撫城 陽曲 平寇注

真君七年併三堆朔方定陽屬焉永安中屬有雞頭山神

祠三會河 蒲子注始光三年置真君七年併平河屬焉

永安中屬有索山祠 驢夷

北齊河清二年周將楊忠襲并州不克而還遂於古城北面

築城先未置城定襄平寇蒲子三縣其中移肆州於雁門

隋書定襄郡註開皇五年置雲州總管府大業元年府廢領

縣一大利註大業初置帶郡有長城有陰山有紫河

隋開皇十年移平寇於代州之崞縣省定襄并秀容

唐武德二年劉武周將楊長材據定襄四年李大恩討平之  
封定襄王析秀容復置定襄 舊唐志定襄漢陽曲縣地  
後漢末移陽曲於太原界置乃於陽曲古城置定襄縣後  
廢武德四年分秀容縣復置有石門關

宋熙寧五年省定襄入秀容元祐元年定襄復為縣入忻州  
古定襄城在城外漢為縣後廢今縣乃其內城也魏土風記  
夏后氏築或曰趙襄子又曰石勒起兵築相傳通忻州劉  
家溝屠岸賈洞

定襄辨 今之定襄古陽曲也漢高帝置定襄郡領縣十  
二曰成樂桐過都武武進襄陰武臯駱安陶武成武要定  
襄復陸後漢以故屬雁門之善無中陵與桐過武成駱隸  
定襄郡而以定襄縣改屬雲中郡建安時移陽曲於太原

界乃於其故城置定襄縣隸新興郡晉改晉昌縣北魏定  
襄并雲中九原晉昌三縣來屬隋省入秀容唐武德初析  
秀容置定襄隸忻州貞觀十四年自朔州北定襄城移雲  
中置定襄縣永淳元年移民於朔州開元二十年移雲州  
仍改定襄為雲中縣屬雲中郡宋省入秀容後復為定襄  
金元因之此定襄郡縣之始末也大抵古雲中定襄地本  
相近古雲中在朔郡邊外古東勝界定襄在雲中東南魏  
都定襄之盛樂盛樂即成樂背負陰山前帶黃河後自雲中徙  
都平城即今大同郡治雁門關外又有小平城皆雁門郡  
地東南有參合坡則屬代郡唐徙定襄於雲中後改雲州  
亦即今大同地他如唐豐州之安樂成永濟柵大同川大  
同故城與古雲中地近而與今大同相去數百里若指今

大同爲漢雲中因指今定襄以槩古之定襄是一誤且再  
誤也夫定襄有郡縣之分卽定襄縣亦南北屢遷漢書郡  
國志凡郡治所在縣名必先書前漢定襄郡首成樂在今  
歸化城唐書貞觀十五年突厥思摩帥衆兵渡河居於故  
定襄城卽其地也後漢定襄郡首善無在今朔州十三州  
志所云舊定襄郡是也至漢定襄縣前屬定襄郡後屬雲  
中郡今右玉西有故城卽故縣大同忻州均非漢初定襄  
縣地忻州有新興故城肆州故城今定襄縣有永安城撫  
城古陽曲城距縣百里有古定襄城與魏地形志定襄註  
總合卽舊唐書所云建安時於陽曲故城置定襄縣者亦  
爲有據大同縣西北二十里有定襄城明一統志謂漢郡  
唐縣皆治此按二漢郡治首盛樂善無不聞治平城若指

此爲唐貞觀中所置定襄縣後改爲雲中縣者則得之矣  
又按唐書忻州析秀容置定襄意定襄旣改雲中而秀容  
之析在其後歟今以二漢定襄郡所屬十二縣五城按之  
近日郡縣歸化城近成樂朔州近善無右玉近桐過五寨  
近中陵其餘則多在塞外如武進有白渠水出塞外西至  
沙陵入河西部都尉治武臯有  
荒干水出塞外西至沙陵  
入河中部都尉治是也緣置新興郡後人民四散雖漢  
末驅塞外民實之惠帝又遷弘農三千戶於此而自元魏  
時圖籍已多散失至於唐別置定襄都督府僑治寧朔領  
州四道通大同雲中此又在夏州塞外云

### 靜樂縣

唐志靜樂註武德四年置管州仍析置汾陽六度二縣五年  
曰北管州六年州廢省汾陽六度以靜樂來屬有天池祠



有管涔山北有樓煩關有隋故汾陽宮 憲州本樓煩監  
牧嵐州刺史領之貞元十五年別置監牧使龍紀元年李  
克用表置州領樓煩元池天池三縣

按憲州當在寧武寧化間

宋憲州汾源郡軍事初置樓煩咸平五年移置靜樂軍縣遂  
廢軍又廢樓煩改隸嵐州熙寧三年廢憲州以靜樂縣隸  
嵐州十年復憲州仍領靜樂縣政和五年賜郡名 咸平

九年廢天池元池入靜樂

天池縣城在今縣北百六十里唐志註天池卽雁門關

金興定三年管州升防禦

元初置河北路都元帥府後爲下州隸冀寧路

元史唐以靜樂置管州後州廢屬嵐州後又爲憲州宋爲靜  
樂軍金爲靜樂郡又改爲管州元太祖十六年以嵐州之

岢嵐寧化樓煩併入本州至元二十二年割岢嵐隸嵐州  
而寧化樓煩併入本州

按元史則宋金元時之靜樂所轄廣矣

明於縣北八十里置寧化守禦所千戶

黃圖昌曰宋置崇化火山岢嵐樓煩四軍岢嵐雖重兵而移  
置嵐谷樓煩雖舊號而頗近靜樂蓋岢嵐本因嵐谷得名  
而樓煩則自併北管後已漸南矣獨崇化爲今之寧化去  
寧武爲近火山屬有偏頭去偏頭爲近

契丹占天池廟地知并州韓琦以曩時彼所求修廟檄正之  
永安城舊爲橫水鎮內有只吉大王殿明弘治間移爲縣後  
堂

山西通志卷第一百七十八

堂

永安州府城隍廟水鏡內序其古大王張也

與俱古天出廟祀狀其神靈何以聲輝

寧安縣城隍廟祀其神靈何以聲輝

而對龍眼自稱其管養口龍南矣

黃圖昌曰宋置崇州大山皆屬

而然其北入十里置寧州

對永安州宋金元俱之

而寧州對永安州

而寧州對永安州

而寧州對永安州

而寧州對永安州

